

詞

綜

冊三





詞綜卷十三

宋詞六十八首

辛棄疾三十五首

范成大五首

黃公度三首

葛立方一首

張孝祥五首

姚寬三首

程垓十六首

辛棄疾字幼安歷城人耿京聚兵山東節制忠義

軍馬留掌書記令奉表南歸高宗召見授

承務郎累官浙東安撫使加龍圖閣待制

進樞密都承旨德祐初以謝枋得請贈少

師謚忠敏有稼軒長短句十二卷

青玉案元夕

東風夜放花千樹更吹隕星如雨寶馬雕車香滿路

鳳簫聲動玉壺光轉一夜魚龍舞蛾兒雪柳黃金

縷笑語盈盈暗香去衆裏尋他千百度驀然回首那

人却在燈火闌珊處

踏莎行中秋後二夕帶湖篆崗小酌

夜月樓臺秋香院宇笑吟吟地人來去是誰秋到便

淒涼當年宋玉悲如許隨分盃盤等閑歌舞問他

有甚堪悲處思量却也有悲時重陽節近多風雨

又和趙興國知錄韻

吾道悠悠憂心悄悄最無聊處秋先到西風林外有  
啼鴉夕陽山下多衰草長憶商山當年四老塵埃  
也走咸陽道爲誰書到便憐然至今此意無人曉

念奴嬌書東流村壁

野塘花落又匆匆過了清明時節剗地東風欺客夢  
一枕雲屏寒怯曲岸持觴垂楊繫馬此地曾經別樓  
空人去舊遊飛燕能說聞道綺陌陌東頭行人曾見  
簾底纖纖月舊恨春江流不盡新恨雲山千疊料得  
明朝尊前重見鏡裏花難折也應驚問近來多少華  
髮

破陣子爲陳同甫賦壯詩以寄之

醉裏挑燈看劍夢回吹角連營八百里分麾下炙五  
十絃翻塞外聲沙場秋點兵馬作的盧飛快弓如  
霹靂弦驚了却君王天下事贏得生前身後名可憐  
白髮生

祝英臺近

寶釵分桃葉渡烟柳暗南浦怕上層樓十日九風雨  
斷腸點點飛紅都無人管更誰勸流鶯聲住鬢邊  
覷試把花卜歸期才簪又重數羅帳燈昏哽咽夢中

語是他春帶愁來春歸何處却不解帶將愁去

沁園春帶湖新居

三徑初成鶴怨猿驚稼軒未來甚雲山自許平生意  
氣衣冠人笑抵死塵埃意倦須還身閑貴早豈爲尊  
羹鱸膾哉秋江上看驚絃鴈避駭浪船回東崗更  
葺茅齋好都把軒窗臨水開要小舟行釣先應種柳  
疎籬護竹莫礙觀梅秋菊堪餐春蘭可佩留待先生  
手自栽沉吟久怕君恩未許此意徘徊

滿江紅

家住江南又過了清明寒食花徑裏一番風雨一番  
狼籍紅粉暗隨流水去園林漸覺清陰密算年年落  
盡刺桐花寒無力庭院靜空相憶無處說閑愁極  
怕流鶯乳燕得知消息尺素如今何處也綠雲依舊  
無踪跡謾教人羞去上層樓平蕪碧

又

敲碎離愁紗窗外風搖翠竹人去後吹簫聲斷倚樓  
人獨滿眼不堪三月暮舉頭已覺千山綠但試把一  
紙寄來書從頭讀相思字空盈幅相思意何時足  
滴羅襟點點淚珠盈掬芳草不迷行客路垂楊只礙  
離人目最苦是立盡月黃昏闌干曲

又送李正之提刑入蜀

蜀道登天一盃送繡衣行客還自歎中年多病不堪  
離別東北看騰諸葛表西南更草相如檄把功名收  
拾付君侯如椽筆兒女淚君休滴荆楚跡吾能識  
要新詩準備廬山山色赤壁磯頭千古浪銅鞮陌上  
三更月正梅花萬里雪深時須相憶

又江行簡楊濟翁周顯先

過眼溪山怪都是舊時曾識還記得夢中行遍江南  
江北佳處徑須攜杖去能消幾兩平生屐笑塵勞三  
十九年非長爲客吳楚地東南圻英雄事曹劉敵  
被西風吹盡了無塵跡樓觀甫成人已去旌旗未卷  
頭先白歎人生哀樂轉相尋今猶昔

水調歌頭

舟次揚州和楊濟翁周顯先韻

落日塞塵起馬獵清秋漢家組練十萬列檻聳層  
樓誰道投鞭飛渡憶昔鏘鳴血汚風雨佛狸愁季子  
正年少匹馬黑貂裘今老矣搔白首過揚州倦游  
欲去江上手種橘千頭二客東南名勝萬卷詩書事  
業嘗試與君謀莫射南山虎直覓富平侯

又

四坐且勿語聽我醉中吟池塘春草未歇高樹變鳴

禽鴻鴈初飛江上蟋蟀還來牀下時序百年心誰要  
卿料理山水有清音歡多少歌長短酒淺深而今  
已不如昔後定不如今閑處直須行樂良夜更教秉  
燭高會惜分陰白髮短如許黃菊情誰簪

又壬子三山被召陳端仁給事飲錢

長恨復長恨裁作短歌行何人爲我楚舞聽我楚狂  
聲余旣滋蘭九畹又樹蕙之百畝秋菊更餐英門外  
滄浪水可以濯吾纓一盃酒問何似身後名人閒  
萬事毫髮常重泰山輕悲莫悲生離別樂莫樂新相  
識兒女古今情富貴非吾事歸與白鷗盟

又

帶湖吾甚愛千丈翠奩開先生杖履無事一日走千  
回凡我同盟鷗鷺今日旣盟之後來往莫相猜白鶴  
恁何處嘗試與偕來破青萍排翠藻立蒼苔窺魚  
笑汝癡計不解舉吾杯廢沼荒丘疇昔明月清風此  
夜人世幾歡哀東岸綠陰少楊柳更須栽

賀新郎別茂嘉十二弟

綠樹聽鶗鴂更那堪杜鵑聲住鷓鴣聲切啼到春歸  
無啼處苦恨芳菲都歇算未抵人間離別馬上琵琶  
關塞黑更長門翠輦辭金闕看燕燕送歸妾將軍



百戰身名裂向河梁回頭萬里故人長絕易水蕭蕭  
西風冷滿座衣冠似雪正壯士悲歌未徹啼鳥還知  
如許恨料不啼清淚長啼血誰伴我醉明月

又賦琵琶

鳳尾龍香撥自開元霓裳曲罷幾番風月最苦潯陽  
江頭客畫舸亭亭待發記出塞黃雲堆雪馬上離愁  
三萬里望昭陽宮殿孤鴻沒絃解語恨難說 遼陽  
驛使音塵絕瑣窗寒輕攏慢撚淚珠盈睫推手含情  
還却手一抹梁州哀徹千古事雲飛烟滅賀老定場  
無消息想沉香亭北繁華歇彈到此爲嗚咽

木蘭花慢除州送花倅

老去情味減對別酒怯流年况屈指中秋十分好月  
不照人圓無情水都不管共西風只管送歸船秋晚  
蓴鱸江上夜深兒女燈前 征衫便好去朝天玉殿  
正思賢想夜半承明留教視草却遣籌邊長安故人  
問我道愁腸殢酒只依然目斷秋霄落鴈醉來時響  
空絃

摸魚兒淳熙己亥自湖北漕移湖南同官王正

之置酒小山亭賦

更能消幾番風雨匆匆春又歸去惜春長怕花開早

何况落紅無數春且住見說道天涯芳草無一作迷  
歸路怨春不語算只有殷勤畫簷蛛網盡日惹飛絮  
長門事準擬佳期又誤蛾眉曾有人妒千金縱買  
相如賦脈脈此情誰訴君莫舞君不見玉環飛燕皆  
塵土閑愁最苦休去倚危欄斜陽正在烟柳斷腸處  
羅大經云詞意殊怨使在漢唐時寧不買種豆種桃  
之禍然聞壽皇見此詞頗不悅終不加以罪可謂盛  
德

太常引建康中秋夜爲呂潛叔賦

一輪秋影轉金波飛鏡又重磨把酒問姮娥被白髮  
欺人奈何乘風好去長安萬里直下看山河斫去  
桂婆娑人道是清光更多

水龍吟過南嶺雙溪樓

舉頭西北浮雲倚天萬里須長劍人言此地夜深長  
見斗牛光焰我覺山高潭空水冷月明星淡待燃犀  
下看凭欄却怕風雷怒魚龍慘峽束蒼江對起過  
危樓欲飛還斂元龍老矣不妨高臥水壺涼簟千古  
興亡百年悲笑一時登覽問何人又卸片帆沙岸繫  
斜陽纜

又旅次登樓

楚天千里清秋水隨天去秋無際遙岑遠目獻愁供  
恨玉簪螺髻落日樓頭斷鴻聲裏江南遊子把吳鉤  
看了闌干拍遍無人會登臨意休說鱸魚堪膾儘  
西風季鷹歸未求田問舍怕應羞見劉郎才氣可惜  
流年憂愁風雨樹猶如此倩何人喚取紅巾翠袖搵  
英雄淚

鷓鴣天鵝湖歸病起作

枕簟溪堂冷欲秋斷雲依水晚來收紅蓮相倚深如  
怨白鳥無言定是愁書咄咄且休休一丘一壑也  
風流不知筋力衰多少但覺新來嬾上樓

西河送錢仲耕自江西移守婺州

西江水道是西江人淚無情却解送行人月明千里  
從今日日倚高樓傷心烟樹如薺會君難別君易  
草草不知人意十年著破繡衣茸種成桃李問君可  
是厭承明東方鼓吹千騎對梅花更消一醉看明  
年調鼎風味老病自憐憔悴過吾廬定有幽人相問  
歲晚淵明歸來未

永遇樂京口北固亭懷古

千古江山英雄無覓孫仲謀處舞榭歌臺風流總被  
雨打風吹去斜陽草樹尋常巷陌人道寄奴曾住想

當年金戈鐵馬氣吞萬里如虎  
元嘉草草封狼居胥意贏得倉皇北顧四十三年望中猶記燈火揚州路可堪回首佛狸祠下一片神鴉社鼓憑誰問廉頗老矣尚能飯否岳倦翁云此作微覺用事多

漢宮春立春

春已歸來看美人頭上裊裊春幡無端風雨未肯收  
盡餘寒年時燕子料今宵夢到西園渾未辦黃柑薦酒更傳青韭堆盤却笑東風從此便薰梅染柳更沒些閑閑時又來鏡裏轉變朱顏清愁不斷問何人會解連環生怕見花開花落朝來塞鴈先還

又會稽秋風亭觀雨

亭上秋風記去年嫋嫋曾到吾廬山河舉目雖異風景非殊功成者去覺團扇便與人疎吹不斷斜陽依舊茫茫禹跡都無千古茂林猶在甚風流章句解擬相如只今木落江冷渺渺愁余故人書報莫因循忘却蓴鱸誰念我新涼燈火一編太史公書

新荷葉和趙德莊韻

人已歸來杜鵑欲勸誰歸綠樹如雲等閑付與鶯飛  
免葵燕麥問劉郎幾度沾衣翠屏幽夢覺來水繞山圍有酒重攜小園隨意芳菲往日繁華而今物是

人非春風半面記當年初識崔徽南雲鴈少錦書無箇因依

南鄉子登京口北固亭

何處望神州滿眼風光北固樓千古興亡多少事悠悠不盡長江滾滾流年少萬兜鍪坐斷東南戰未休天下英雄誰敵手曹劉生子當如孫仲謀

蝶戀花元日立春

誰向椒盤簪綵勝整整韶華爭上春風鬢往日不堪重記省爲花常抱新春恨春未來時先借問晚恨開遲早又飄零近今歲花期消息定只愁風雨無憑準

清平樂獨宿博山王氏菴

遶牀飢鼠蝙蝠翻燈舞屋上松風吹急雨破紙窗間自語平生塞北江南歸來華髮蒼顏布被秋宵夢覺眼前萬里江山

菩薩蠻書江西造口壁

鬱孤臺下清江水中間多少行人淚西北是長安可憐無數山青山遮不住畢竟東流去江晚正愁余山深開鷓鴣羅大經云南渡初金人追隆祐太后御舟至造口不及而還鷓鴣之句謂恢復之事行不得



也

生查子有覓詞者爲賦

去年燕子來繡戶深深處花徑得泥歸都把琴書污  
今年燕子來誰聽呢喃語不見捲簾人一陣黃昏  
雨

浪淘沙 山寺夜作

身世酒盃中萬事皆空古來三五箇英雄雨打風吹  
何處是漢殿秦宮 夢入少年叢歌舞匆匆老僧夜  
半誤鳴鐘驚起西窗眠不得捲地西風

定風波 暮春漫興

少日春懷似酒濃插花走馬醉千鐘老去逢春如病  
酒唯有茶甌香篆小薰籠 卷盡殘花風未定休恨  
花開原自要春風試問春歸誰得見飛燕來時相遇  
夕陽中

范成大 字致能吳郡人紹興中進士累官權吏部

尚書參知政事尋帥金陵以病請閑進資  
政殿學士領洞霄宮加大學士卒謚文穆  
有石湖集詞一卷

眼兒媚 萍鄉道中

酣酣日脚紫烟浮妍暖破輕裘困人天氣醉人花氣

詞

綜 卷十三

六一中華書局聚

午夢扶頭 春慵恰似春塘水一片穀紋愁溶溶曳曳東風無力欲皺還休

菩薩蠻 湘東驛

客行忽到湘東驛明朝真是瀟湘客晴碧萬重雲幾時逢故人 江南如塞北別後書難得先自鴈來稀那堪春半時

謁金門 宜春道中野塘春水可喜有懷舊隱

塘水碧仍帶麴塵顏色泥泥穀紋無氣力東風如愛惜 恰似越來溪側也有一雙鸂鶒只欠柳絲千百尺繫船春弄笛

秦樓月 寒食日湖南提舉胡元高家席上聞琴

湘江碧故人同作湘中客湘中客東風回鴈杏花寒食 溫溫月到藍橋側醒心絃裏春無極春無極明朝殘夢馬嘶南陌

霜天曉角 梅

晚晴風歇一夜春堪折脈脈花疎天淡雲來去數枝月 勝絕愁更絕此情誰與說惟有兩行低鴈知人倚闌干雪

黃公度

字思憲莆陽人紹興八年進士第一官尚書考功員外郎有知稼翁集詞一卷

好事近

湖上送殘春已負別時歸約好在故園桃李爲誰開  
誰落還家應是荔支天浮蟻要人酌莫把舞裙歌  
扇便等閑拋却

卜算子別士□第之官

薄宦各東西往事隨風雨先自離歌不忍聞又何況  
春將暮愁共落花多人逐征鴻去君向瀟湘我向  
秦後會知何處

青玉案

鄰雞不管離懷苦又還是催人去回首高城音信阻  
霜橋月館水村烟市總是思君處裏殘別袖燕支  
雨謾留得愁千縷欲倩歸鴻分付與鴻飛不住倚欄  
無語獨立長天暮按本集公登第後爲趙忠簡所器而秦檜頗銜之及召赴行在雖知非當路意而迫於君命故寓意此詞蓋去就早定矣

葛立方字常之丹陽人勝仲子紹興八年進士官

至吏部侍郎有歸愚集詞一卷

卜算子

裊裊水芝紅脈脈蒹葭浦淅淅西風澹澹烟幾點疎  
疎雨草草展杯觴對此盈盈女葉葉紅衣當酒船

細細流霞舉

張孝祥

字安國烏江人紹興二十四年廷試第一

累遷中書舍人直學士院兼都督府參贊

軍事領建康留守尋以荆南湖北路安撫

使請祠進顯謨閣直學士有于湖集詞一

卷

黃叔暘云于湖有紫微雅詞湯衡爲序稱

其平昔未嘗著藁筆酣興健頃刻卽成却

無一字無來處

滿江紅聽雨

斗帳高眠寒窗靜瀟瀟雨意南樓近更移三鼓漏傳  
一水點點不離楊柳外聲聲只在芭蕉裏也不管滴  
破故鄉心愁人耳無似有遊絲細聚復散真珠碎  
天應分付與別離滋味破我一牀蝴蝶夢輸他雙枕  
鴛鴦睡向此際別有好思量人千里

念奴嬌

星沙初下望重湖遠水長雲漠漠一葉扁舟誰念我  
今日天涯飄泊平楚南來大江東去處處風波惡吳  
中何地滿懷俱是離索長記送我行時綠波亭上  
泣透青羅薄檣燕低飛人去後依舊湘城簾幕不盡

山川無窮烟浪辜負秦樓約漁歌聲斷爲君雙淚傾落

鷓鴣天

日日青樓醉夢中不知樓外已春濃杏花未濕疎疎雨楊柳初搖短短風扶畫鷁躍花驄湧金門外小橋東行行又入笙歌裏人在珠簾第幾重

西江月 洞庭

問訊湖邊春色重來又是三年東風吹我過湖船楊柳絲絲拂面世路如今已慣此心到處悠然寒光亭下水連天飛起沙鷗一片

六州歌頭

長淮望斷闕塞莽然平征塵暗霜風勁悄邊聲黯銷凝追想當年事殆天數非人力洙泗上絃歌地亦殫腥隔水氈鄉落日牛羊下區脫縱橫看名王宵獵騎火一川明笳鼓悲鳴遣人驚念腰間箭匣中劍空埃蠹竟何成時易失心徒壯歲將零渺神京干羽方懷遠靜烽燧且休兵冠蓋使紛馳驚若爲情聞道中原遺老常南望翠葆霓旌使行人到此忠憤氣填膺有淚如傾朝野遺記云安國在建康留守席上賦此歌闋魏公爲罷席而入



姚

寬字令威剡川人爲六部監門有西溪居士  
樂府一卷

憶王孫

麝麝楊柳綠初低澹澹梨花開未齊樓上情人聽馬  
嘶憶郎歸細雨春風濕酒旗

生查子

卽如陌上塵妾似隄邊絮相見兩悠揚踪跡無尋處  
酒面撲春風淚眼零秋雨過了別離時還解相思  
否

踏莎行

蘋葉烟深荷花露濕碧蘆紅蓼秋風急采菱渡口日  
將沉飛鴻樓上人空立彩鳳難雙紅綃暗泣回紋  
未剪吳刀澀夢魂歸處不留踪厭厭一夜涼蟾入  
程

按正伯與子瞻爲中表兄弟故其詞有相  
亂者

酹相思

月挂霜林寒欲墜正門外催人起奈離別如今真個  
是欲住也留無計欲去也來無計馬上離魂衣上  
淚各自箇供憔悴問江路梅花開也未春到也須頻

寄人別也須頻寄

小桃紅

不恨殘花驛不恨殘春破只恨流光一年一度又催  
新火縱青天白日繫長繩也留春得麼花院從教  
鎖春事從教過燒筍園林嘗梅臺榭有何不可已安  
排珍簾小胡牀待日長閑坐

芭蕉雨

雨過涼生藕葉晚庭消盡暑渾無熱枕簟不勝香滑  
爭奈寶帳情生金尊意愜玉人何處夢蝶思一見  
冰雪須寫個帖兒叮嚀說試問道肯來麼今夜小院  
無人重樓有月

摸魚兒

掩淒涼黃昏庭院角聲何處嗚咽矮窗曲屋風燈冷  
還是苦寒時節凝竚切念翠被薰籠夜夜成虛設倚  
窗愁絕聽鳳竹聲中犀幃影外簌簌釀寒雪傷心  
處却憶當年輕別梅花滿院初發吹香弄藥無人見  
惟有暮雲千疊情未徹又誰料而今好夢分吳越不  
堪重說但記得當初重門鎖處猶有夜深月

念奴嬌

秋風秋雨正黃昏供斷一窗愁絕帶減衣寬誰念我

難忍重城離別轉枕褰帷挑燈整被總是相思切知  
他別後負人多少風月不是怨極愁濃只愁重見  
了相思難說料得新來魂夢裏不管飛來蝴蝶排悶  
人間寄愁天上終有歸時節如今無奈亂雲依舊千  
疊

南浦

金鴨爍薰香向晚來春醒一枕無緒濃綠漲瑤窗東  
風外吹盡亂紅飛絮無言竚立斷腸惟有流鶯語碧  
雲欲暮空惆悵韶華一時虛度追思舊日心情記  
題葉西樓吹花南浦老去覺歡疎疎傷春恨多付斷雲  
殘雨黃昏院落問誰猶在凭欄處可堪杜宇但只解  
聲聲催他春去

滿庭芳 臨安晚登

南月驚烏西風破鴈又是秋滿平湖採蓮人靜寒色  
戰菰蒲舊信江南好景一萬里輕覓蓴鱸誰知道吳  
儂未識蜀客已情孤憑高增悵望湘雲盡處都是  
平蕪問故鄉何日重見吾廬縱有荷紉芰製終不似  
菊短籬疎歸情遠三更雨夢依舊繞庭梧

漁家傲 彭門道中

獨木小舟烟雨濕燕兒亂點春江碧江上青山隨意

覓人寂寂落花芳草催寒食  
昨夜青樓今日客吹  
愁不得東風力細拾殘紅書怨泣流水急不知那個  
傳消息

南鄉子

幾日訴離尊歌盡陽關不忍分此度天涯真個去消  
魂相送黃花落葉村斜日又黃昏蕭寺無人半掩  
門今夜粉香明日淚休論只要羅巾記舊痕

憶秦娥

青門深海棠開盡春陰陰春陰陰萬重雲水一寸歸  
心玉樓深鎖烟消沉知他何日同登臨同登臨待  
收紅淚細說如今

謁金門

春夜雨催潤柳塘花塢小院重門深幾許畫簾香一  
縷獨立晚庭凝竚細把花枝閑數燕子不來天欲  
暮說愁無處所

卜算子

獨自上層樓樓外青山遠望到斜陽欲盡時不見西  
飛燕獨自下層樓樓下蛩聲怨待到黃昏月上時  
依舊柔腸斷

菩薩蠻

詞

綜卷十三

十一中華書局聚

畫橋拍拍春江綠行人正在春江曲花潤接平川有人花底眠東風元自好只怕催花老安得萬垂楊繫教春日長

愁倚欄令

春猶淺柳初芽杏初花楊柳杏花交映處有人家玉窗明煖烘霞小屏上水遠山斜昨夜酒多春睡重莫驚他

水龍吟

夜來風雨匆匆故園定是花無幾愁多怨極等閑孤負一年芳意柳困桃慵杏青梅小對人容易算好春長在好花長見元只是人憔悴回首池南舊事恨星星不堪重記如今但有看花老眼傷時清淚不怕逢花瘦只愁怕老來風味待繁紅亂處留雲借月也須攢醉

洞庭春色

錦字親裁淚巾偷裏細說舊時記笑桃門巷妝窺寶靨弄花庭榭香濕羅衣幾度相隨游冶去任月細風尖猶未歸多少事有垂楊眼見紅燭心知如今事都過也但贏得雙鬢成絲數半妝紅豆相思有分兩分青鏡重合難期惆悵一春飛絮夢恁悠颺教人分



付誰銷魂處又梨花雨暗半掩重扉

詞綜卷十三



詞綜卷十四

宋詞六十八首

韓元吉五首

周必大一首

京鏗一首

尤袤一首

仲并二首

朱熹一首

真德秀一首

趙汝愚一首

洪适四首

吳儆四首

楊萬里一首

李處全二首

張震二首

羅願一首

崔與之一首

劉克莊八首

樓鑄一首

吳琚一首

趙彥端七首

管鑑一首

魏子敬一首

甄龍友一首

俞國寶一首

衛元卿一首

李石二首

張鑑三首

杜旟三首

劉擬四首

岳珂一首

程秘一首

王千秋一首

程先一首

蘇洵一首

劉圻父一首

韓元吉字无咎號南澗許昌人官吏部尚書有焦

六州歌頭

東風著意先上小桃枝紅粉膩嬌如醉倚朱扉記年  
時隱映新妝面臨水岸春將半雲日煖斜陽轉夾城  
西草軟沙平驟馬垂楊渡玉勒爭嘶認蛾眉凝笑臉  
薄拂胭脂繡戶曾窺恨依依昔攜手處香如霧紅  
隨步怨春遲消瘦損憑誰問只花知淚空垂舊日堂  
前燕和烟雨又雙飛人自老春長好夢佳期前度劉  
郎幾許風流地也自應悲但茫茫暮靄目斷武陵溪  
往事難追

薄倖

送君南浦對烟柳青青萬縷更滿眼殘紅吹盡葉底  
黃鸝自語甚動人多少離情樓頭水闊山無數記竹  
裏題詩花邊載酒魂斷江干春暮都莫問功名事  
白髮星星如許任雞鳴起舞鄉關何在憑高目盡孤  
鴻去漫留君住趁酴醾香煖持杯且醉瑤臺路相思  
記取愁絕西窗夜雨

謁金門 春雪

春尚淺誰把玉英裁剪儘道梅梢開未遍卷簾花滿  
院樓上酒融歌煖樓下水平烟遠却似湧金門外

見絮飛波影亂

霜天曉角 題采石蛾眉亭

倚天絕壁直下江千尺天際兩蛾橫黛愁與恨幾時  
極 暮潮風正急酒闌聞塞笛試問謫仙何處青山  
外遠烟碧

水龍吟 題三峯閣詠英華女子

雨餘疊巘浮空望中秀色仙都是洞天未鎖人間春  
好玉妃曾墜錦瑟繁絃鳳笙清響九霄歌吹問分香  
舊事劉郎去後知誰伴風前醉 回首暝烟千里但  
紛紛落紅如淚多情易老青鸞何許詩成誰寄斗轉  
參橫半簾花影一溪寒水悵飛鳧路杳行雲夢斷有  
三峯翠

周必大 字子充一字弘道廬陵人紹興二十一年

進士歷官左丞相封益國公贈太師謚文忠  
有省齋集近體樂府一卷

點絳脣 贈歌者小瓊

秋夜乘槎客星容到天孫渚眼波微注將謂牽牛渡  
見了還非重理霓裳舞雖無誤幾年一遇莫訝周  
郎顧

京 鏗 字仲遠豫章人登紹興二十七年進士第



由縣令擢御史遷右司郎官出爲四川安撫使進刑部尚書慶元初官左丞相卒贈太保初謚文穆以家諱從其子請謚文忠改謚莊定有松坡居士樂府一卷

雨中花重陽

玉局祠前銅壺閣畔錦城藥市爭奇正紫萸綴席黃菊浮卮巷陌連鑣並轡樓臺吹竹彈絲登高望遠一年好景九日佳期自憐行客猶對佳賓留連豈是貪癡誰會得心馳北闕興寄東籬惜別未催鷓鴣首追歡且醉蛾眉明年此會他鄉今日總是相思

尤

表字延之無錫人紹興中進士累官禮部尚

書正奉大夫贈光祿大夫謚文簡有梁溪集

瑞鷓鴣詠落梅

清溪西畔小橋東落月紛紛水映空五夜客愁花片裏一年春事角聲中歌殘玉樹人何在舞破山香曲未終却憶孤山醉歸路馬蹄香雪襯東風

仲

并字彌性江都人紹興中進士授平江教授

改左承奉郎歷光祿寺丞終朝請大夫淮東安撫司參議有浮山集

水調歌頭 浮遠堂

靜練平千頃，華棟俯中流。凌晨畫戟來看，宿雨斷虹收。入九胸中雲夢，三千筆端風月，無處快凝眸。笑詠一堂上，揮麈氣橫秋。俯危欄，紅日下，暮雲收。無窮偉觀，祇應天意爲君謀。容我時醒時醉，獨泛微烟微雨，浩蕩逐輕鷗。不羨岳陽勝，丹碧聳層樓。

念奴嬌 同前

練江風靜臥冰奩，百尺朱欄飛入江。遠浮天天在水，水滿半天雲濕白。鳥明邊青山斷處，眼冷江頭立。月明潮上，葦間漁唱聲急。幾度吹老蘋花，野香無數，欲寄應難及。天借詩人供醉眼，尊俎一時收拾。竹裏行廚，花間步障，風雨生呼吸。酒闌歌罷，釣船先具蓑笠。

朱

熹字元晦，一字仲晦，婺源人。第進士，仕至轉

運副使，崇政殿說書，煥章閣待制，致仕，贈

太師，封信國公。改徽國，謚文有文公。集詞

一卷

水調歌頭 櫟括杜牧之九日齊州詩

江水浸雲影，鴻鴈欲南飛。攜壺結客，何處空翠渺烟霏。塵世難逢一笑，况有紫萸黃菊，堪插滿頭歸。風景

今朝是身世昔人非

酬佳節須酩酊莫相違人生

如寄何事辛苦怨斜暉無盡今來古往多少春花秋月那更有危機與問牛山客何必淚沾衣

真德秀

字景元更景希浦城人第慶元進士歷官

翰林學士知制誥贈銀青光祿大夫謚文忠學者稱西山先生

蝶戀花 紅梅

兩岸月橋花半吐紅透肌香暗把遊人誤盡道武陵溪上路不知迷入江南去  
先自冰霜真態度何事枝頭點點胭脂污莫是東君嫌淡素問花花又嬌無語

趙汝愚

字子直漢王元佐七世孫家餘干舉進士

第一累官光祿大夫右丞相贈太師追封沂國公謚忠定

柳梢青 題豐樂樓

水月光中烟霞影裏湧出樓臺空外笙簫人間笑語身在蓬萊  
天香暗逐風回正十里荷花盡開買箇輕舟山南遊遍山北歸來

洪适

字景伯皓子中博學宏詞科累官尚書右

僕射同中書門下平章事兼樞密使謚文

好事近別傳文

柳岸碧漪深底事催人行色無計相留情話只別愁  
如織小蠻樊素兩傾城幾度醉狂客明日扁舟西  
去聽歌聲不得

生查子

桃疎蝶惜香柳困鶯銜絮日影過簾旌多少閑愁緒  
紅綻武陵溪綠暗章臺路春色似行人無意花間  
住

浣溪沙錢范子芬行

整頓春衫欲跨鞍一杯相屬少開顏愁蛾不似舊時  
彎未見兩星添柳宿忍教三疊唱陽關相思空望  
會稽山

虞美人

芭蕉滴滴窗前雨望斷江南路亂雲重疊幾多山不  
似倦飛鷗鳥便知還角聲更聽譙門弄夜夜思歸  
夢鄱江樓下水含漪姑負釣灘烟艇綠蓑衣

吳

儆

字益恭休寧人紹興二十七年進士淳熙

初通判邕州已除知州兼廣南西路安撫  
都監以親老丐祠主管台州崇道館轉朝

散郎致仕寶祐中追謚文肅有竹洲集詞

珍傲宋版印

一卷

滿庭芳 寄葉蔚宗

草滿池塘鶯啼楊柳燕忙知爲泥融飄花流水竹外  
小橋通又是一春憔悴摘殘英遍遶芳叢長安遠平  
蕪盡處疊疊但雲峯 西湖行樂處牙檣漾鷁錦帳  
翻虹想年時桃李應已成空欲寫相思寄與雲天闊  
難覓征鴻空凝想時時殘夢依約上陽鐘

浣溪沙 題星州寺

十里青山沂碧流夕陽沙晚片帆收重重烟樹出層  
樓 人去人歸芳草渡鷗飛鷗沒白蘋洲碧桐翠竹  
記曾遊

又題餘干傳舍

畫楯朱欄繞碧山平湖徙倚水雲寬人家楊柳帶汀  
灣 目力已隨飛鳥盡機心還逐白鷗閑蕭蕭微雨  
晚來寒

減字木蘭花 中秋獨與靜之飲

碧梧秋老滿地琅玕紛不掃門掩黃昏惟有年時月  
照人 淒涼滿眼肯作六年燈火伴莫說淒涼來歲  
如今又一方



楊萬里字廷秀吉水人紹興中進士歷秘書監以  
寶文閣待制致仕進寶謨閣學士贈光祿  
大夫謚文節有誠齋集樂府一卷

### 好事近

月未到誠齋先到萬花川谷不是誠齋無月隔一庭  
脩竹如今纔是十三夜月色已如玉未是秋光奇  
絕看十五十六

李處全字粹伯淳熙中侍御史有晦菴詞一卷

### 水調歌頭

送王景文

上馬趣攜酒送客古朱方秋風斜日山際低草見牛  
羊醪醑不知更漏但見橫江白露清映月如霜平曉  
廣寒殿誰說路岐長醉還醒時起舞念吾鄉江山  
爾爾回首千載幾興亡一笑書生事業誰笑管城居  
士不換碧油幢好在中泠水擊節奏伊涼

### 菩薩蠻

杜鵑只管催歸去知渠教我歸何處故國淚生痕那  
堪枕上聞嚴裝吾已具泛宅吳中路弭楫喚東鄰  
江東日暮雲

張

震字東父號無隱居士益寧人孝宗朝爲諫  
官

黃叔暘云無隱居士詞甚婉媚蓋富貴人語也

### 驀山溪

青梅如豆斷送春歸去小綠間長紅看幾處雲歌柳舞  
偎花識面對月共論心攜素手采香遊踏遍西池路  
水邊朱戶曾記銷魂處小立背秋千空悵望娉婷韻度  
楊花撲面香糝一簾風情脈脈酒厭厭回首斜陽暮

### 蝶戀花

梅子初青春已暮芳草連雲綠遍西池路小院繡簾  
纔半舉銜泥紫燕雙飛去人在赤欄橋畔住不解  
傷心還解相思否清夢欲尋猶間阻紗窗一夜蕭蕭  
雨

羅

願

字端良號存齋歙縣人紹興中以蔭補承務郎監臨安新城稅歷鄂州守有鄂州小

集

### 水調歌頭

中秋和施司諫

秋宇淨如水月鏡不安臺鬱孤高處張樂語笑脫塵埃  
簷外白毫千丈坐上銀河萬斛心境兩佳哉俯仰共清  
絕底處著風雷問天公邀月姊媿凡才婆娑

人世羞見蓬鬢漾金壘來歲公歸何處照耀彩衣簪  
橐禁直且休催一曲庾江上千古繼韶陔

崔與之字正子廣州人紹熙四年進士累官廣東  
經略安撫使兼知廣州拜參知政事右丞  
相皆力辭以觀文殿大學士致仕封南海  
郡公卒謚清獻有集

### 水調歌頭

萬里雲間戍立馬劍門關亂山極目無際直北是長  
安人苦百年塗炭鬼哭三邊鋒鏑天道久應還手寫  
留屯奏炯炯寸心丹對青燈搔白髮漏聲殘老來  
勲業未就妨却一身閑梅嶺綠陰青子蒲澗清泉白  
石怪我舊盟寒烽火平安夜歸夢到家山

劉克莊

字潛夫莆田人以蔭仕淳熙中賜同進士

出身官龍圖閣直學士有後村別調一卷

### 憶秦娥

遊人絕緣陰滿野芳菲歇芳菲歇養蠶天氣采茶時  
節枝頭杜宇啼成血陌頭楊柳吹成雪吹成雪淡  
烟疎雨江南三月

### 玉樓春呈林節推

年年躍馬長安市客裏似家家似寄青錢喚酒日無

何紅燭呼盧宵不寐 易挑錦婦機中字難得玉人  
心下事男兒西北有神州莫洒水西橋畔淚

賀新郎端午

思遠樓前路望平隄十里湖光畫船無數綠蓋盈盈  
紅粉面葉底荷花解語鬪巧結同心雙縷尚有經年  
離別恨一絲絲總是相思處相見也又重午 清江  
舊事傳荆楚數人情千載如新尚沉菰黍且盡樽前  
今日醉誰肯獨醒弔古汎幾盞菖蒲綠醕兩兩龍舟  
爭競渡奈珠簾暮捲西山雨看未足怎歸去

又遊周氏花園

溪上收殘雨倚危欄薄綿乍脫日陰亭午鬧市不知  
春色處處散在荒園廢墅漸小白長紅無數客子雖非  
河陽令也隨緣暫作鶯花主那可負甕中醕 碧雲  
四合千巖暮恨匆匆余方有事子姑歸去趁取羣芳  
未搖落暇日提魚就煮數激電光陰如許回首明年  
何處在問桃花尚記劉郎否公莫笑醉中語

滿江紅

落日登樓誰管領倦遊在客待喚起滄浪漁父隔江  
吹笛看水看山身尚健憂晴憂雨頭先白對暮雲不  
見美人來遙天碧 山中鶴應相憶沙上鷺渾相識

想石田茆屋草深三尺空有鬢如潘騎省斷無面見  
陶彭澤便倒傾海水浣衣塵難湔滌

清平樂 贈維揚陳師文參議家舞姬

宮腰束素只怕能輕舉好築避風臺護取莫遣驚鴻  
飛去 一團香玉溫柔笑顰俱有風流貪與蕭郎眉  
語不知舞錯伊州

摸魚兒

怪新來倚樓看鏡清狂渾不如舊暮雲千里傷心處

一作色

那更亂蟬疎柳凝望久愴故國百年陵闕誰

回首功名大謬歎采藥名山讀書精舍此計幾時就  
封侯事久矣輸人妙手滄洲一作扁舟聊作漁叟  
高冠長劍都閑物世上切身惟酒千載後君試看拔  
山扛鼎俱烏有英雄骨朽問顧曲周郎而今還解來  
聽小詞否

長相思

朝有時暮有時潮水猶知日雨回人生長別離 來  
有時去有時燕子猶知社後歸君行無定期

樓

鰲字巨山淳熙中知江陰軍

浣溪沙 雙檜堂

夏半陽烏景最長小池不斷藕花香電影雷聲催急



雨十分涼 芡剝明珠隨意嚼瓜分瓊玉趁時嘗雙  
檜堂深新釀好且傳觴

吳

琚

字居夫汴人憲聖皇后姪太寧郡王益之

子歷尚書郎部使者直學士慶元中以鎮  
安節度使守建康遷少保卒謚忠惠有雲

壘集

醉江月觀潮應制

玉虹遙挂望青山隱隱有如一抹忽覺天風吹海立  
好似春霆初發白馬凌空瓊鰲駕水日夜朝天闕飛  
龍舞鳳鬱葱環拱吳越此景天下應無東南形勝  
偉觀真奇絕好是吳兒飛彩幟蹴起一江秋雪黃屋  
天臨水犀雲擁看擊中流楫晚來波靜海門飛上明  
月

趙彥端

字德莊乾道淳熙間以直寶文閣知建寧

府有介庵詞四卷

千秋歲

杏花風下獨立春寒夜微雨度疎星挂輝輝濃艷出  
媚媚繁枝亞朱檻倚輕羅醉裏添還卸寂寞情猶  
乍悵望驂鸞駕衣褪玉香欺麝一花攢一醉杯重憑  
誰把春去也重簾翠幕人如畫

謁金門

休相憶明日遠如今日樓外綠烟村冪冪花飛如許  
急柳外晚來船集波底夕陽紅濕送盡去雲成獨  
立酒醒愁又入張正夫云德莊宗室之秀賦西湖謁  
金門云波底夕陽紅溼阜陵問誰詞答云彥端所作  
上云我家裏人也曾作此等語喜甚

青玉案贈勉道琵琶人

當年萬里龍沙路載多少離愁去冷壓層簾雲不度  
芙蓉雙帶垂楊嬌髻絃索初誰處花凝玉立東風  
暮會記江邊麗人句異縣相逢能幾許多情誰料琵  
琶洲畔同醉清明雨

沙塞子

春水綠波南浦漸理棹行人欲去黯銷魂柳際輕烟  
花梢微雨長亭放餞無計住但芳草迷人去路忍  
回頭斷雲殘日長安何處

清平樂席上贈人

桃根桃葉一樹芳相接春到江南三二月迷損東家  
蝴蝶殷勤踏取青陽風前花正低昂與我同心支  
子報君百結丁香

點絳脣途中逢管倅

顚顚天涯故人相遇情如故別離何遽忍唱陽關句  
我是行人更送行人去愁無據寒蟬鳴處回首斜  
陽暮

虞美人

斷蟬高柳斜陽處池閣絲絲雨綠檀珍簟卷新紅屈  
曲杏花蝴蝶小屏風春山疊疊秋波漫收拾殘鍼  
線又成嬌困倚檀郎無事更拋蓮子打鴛鴦

豆葉黃

粉牆丹檻柳絲中簾箔輕明花影重午醉醒來一面  
風綠蔥蔥幾顆櫻桃葉底紅

管

鑑字明仲有養拙堂詞一卷

生查子

天教百媚生賦得多情怨背整玉搔頭寬了黃金釧  
情隨歌意深故故回嬌盼不是不相知只爲難相  
見

魏子敬

生查子

愁盈鏡裏山心疊琴中恨露濕玉蘭秋香伴金屏冷  
雲歸月正圓鴈到人無信孤損鳳凰釵立盡梧桐  
影劉興伯云此詞題道塗壁甚工

甄龍友字雲卿永嘉人紹興中進士官國子監簿

霜天曉角題赤壁

峨眉仙客四海文章伯來向東坡遊戲人間世著不得  
去國誰愛惜在天何處覓但見樽前人唱前赤壁  
後赤壁

俞國寶俞一作于臨川人淳熙間太學生有醒菴

遺珠集

風入松題酒肆

一春長費買花錢日日醉湖邊玉驄慣識西湖路驕  
嘶過沽酒樓前紅杏香中歌舞綠楊影裏秋千暖  
風十里麗人天花壓鬢雲偏畫船載得春歸去餘情  
付湖水湖烟明日重扶殘醉來尋陌上花鈿

衛元卿洋州人領薦不得志游山谷間

謁金門

花過雨又是一番紅素燕子歸來愁不語故巢無覓  
處誰在玉樓歌舞誰在玉關辛苦若使邊塵吹得  
去東風侯萬戶

李

石字知幾資陽人乾道中以薦任太學博士  
出爲成都倅有方舟集

臨江仙

詞

綜卷十四

九中華書局聚

烟柳疎疎人悄悄畫樓風外吹笙倚欄聞喚小紅聲  
薰香臨欲睡玉漏已三更坐待不來來又去一方  
明月中庭粉牆東畔小橋橫起來花影下扇子撲流  
螢

漁家傲贈鼎湖官伎

西去征鴻東去水幾重別恨千山裏夢繞綠窗書半  
紙何處是桃花溪畔人千里瘦玉倚香愁黛翠勸  
人須要人先醉問道明朝行也未猶自記燈前背立  
偷垂淚

張

鑑字功甫號約齋西秦人官奉議郎有玉照  
堂詞一卷

鵲橋仙菱

連汀接漱縈蒲帶藻萬鏡香浮光滿濕烟吹霽木蘭  
輕照波底紅嬌翠婉玉纖採來銀籠攜去一曲山  
長水遠絲鴛雙慣貼人飛恨南浦離多夢短

蘭陵王荷花

蓼汀側朝靄依依弄色知何許湘女淡妝羽節飛來  
帶秋碧輕裙素綃織誰與明璫競飾無言處相倚邈  
洄應有柔情正堆積當年駐香鷁記草媚羅裙波  
映文席

斜



陽返照暮雨濕愛天際涼入  
愁寂念疇昔謾太華  
峯頭幽夢尋覓而今兩鬢如花白但一線才思半星  
心力新詞奇句便做有怎道得

滿庭芳 促織

月洗高梧露溥幽草寶釵樓外秋深上花沿翠螢火  
墜牆陰靜聽寒聲斷續微韻轉淒咽悲沉爭求侶殷  
勤勸織促破曉機心  
兒時曾記得呼燈灌穴斂步  
隨音任滿身花影猶自追尋攜向畫堂試鬪亭臺小  
籠巧裝金今休說從渠牀下涼夜聽孤吟

杜

旃字伯高號橋齋金華人呂成公門下士與

第四人並有名譽

陳同甫云伯高奔風逸足而鳴以和鸞仲  
高麗句晏叔原不得擅美叔高戈矛森立  
有吞虎食牛之氣左右輝映匪獨一門之  
盛可謂一時之豪  
葉正則贈幼高云杜  
子五兄弟詞林俱上頭

醉江月 石頭城

江山如此是天開萬古東南王氣一自髯孫橫短策  
坐使英雄鵲起玉樹聲銷金蓮影散多少傷心事千  
年遼鶴併疑城郭非是  
當日萬駟雲屯潮生潮落

處石頭孤峙人笑褚淵今齒冷只有袁公不死斜日  
荒烟神州何在欲墮新亭淚元龍老矣世間何限餘  
子

摸魚兒 湖上

放扁舟萬山環處平鋪碧浪千頃仙人憐我征塵久  
借與夢遊清枕風乍靜望兩岸羣峯倒浸玻璃影樓  
臺相映更日薄烟輕荷花似醉飛鳥墮寒鏡 中都  
內羅綺千街萬井天教此地幽勝仇池仙伯今何在  
隄柳幾眠還醒君試問問此意只今更有何人領功  
名未竟待學取鷗夷仍攜西子來動五湖興

驀山溪

春風如客可是繁華主紅紫未全開早綠遍江南千  
樹一番新火多少倦遊人纖腰柳不知愁猶作風前  
舞 小闌干外兩雨幽禽語問我不歸家有佳人天  
寒日暮老來心事惟只有春知江頭路帶春來更帶  
春歸去

劉

儼 一云名仙掄字叔儼廬陵人有招山集

黃叔暘云叔儼有招山詩集樂章尤爲人

所膾炙

菩薩蠻 海棠

東風去了秦樓畔一川烟草無人管芳樹雨初晴黃  
鸝三兩聲 海棠花已謝春事無多也只有牡丹時  
知他歸不歸

念奴嬌 送張明之赴京西幕

餘煌東下望西江千里蒼茫烟水試問襄州何處是  
雉堞連雲天際叔子殘碑臥龍陳迹遺恨斜陽裏後  
來人物如君瓌偉能幾 其肯爲我來耶河陽下士  
正是強人意勿謂時平無事也便以言兵爲諱眼底  
山河樓頭鼓角都是英雄淚功名機會要須閑暇先  
備

又長沙趙帥席上作

西風何事爲行人掃蕩煩襟如洗熏漲蒸瀾都捲盡  
一片瀟湘清泚酒病驚秋詩愁入鬢對影人千里楚  
宮故事一時分付流水 江上買取扁舟排雲湧浪  
直過金沙尾歸去江南丘壑處不用重尋月姊風露  
杯深芙蓉裳冷笑傲烟霞裏草廬如舊臥龍知爲誰  
起

訴衷情

征衣薄薄不禁風長日雨絲中又是一年春事花信  
到梧桐 雲漠漠水溶溶去匆匆客懷今夜家在江

西身在江東

岳

珂字肅之號倦翁飛孫管內勸農使知嘉興

府歷戶部侍郎淮東總領兼制置使有玉楮集

祝英臺近北固亭

淡烟橫層霧斂勝概分雄占月下鳴榔風急怒濤颭  
關河無限清愁不堪臨鑑正雙鬢秋風塵染謾登  
覽極目萬里沙場事業頻看劍古往今來南北限天  
塹倚樓休弄新聲重城門掩歷歷數西州更點

程

秘字懷古休寧人紹熙四年進士累官寶文

閣學士知福州兼福建安撫使封新安郡  
侯以端明殿學士致仕卒贈特進少師有  
洛水集詞一卷

念奴嬌憶先廬春山之勝

歸來一笑尚看看趁得人間寒食阿壽牽衣仍問我  
雙鬢新來添白忍見庭前去年芳草依舊青青色西  
湖雨後綠波兩岸平拍天教斷送流年三之一矣  
又是成疎隔燕子春寒渾未到誰說江南消息玉樹  
熏香冰桃翻浪好箇真消息這回歸去松風深處橫  
笛

王千秋字錫老東平人有審齋詞一卷

賀新郎 石城弔古

弔古城頭去正高秋霜晴木落路通洲渚欲問紫髯  
分鼎事只有荒祠烟樹巫覡去久無簫鼓霸業荒涼  
遺堞墜但蒼崖日閱征帆渡興與廢幾今古 夕陽  
細草空凝竚試追思當時子敬用心良誤要約劉郎  
銅雀醉底事遽爭荆楚遂但見蜀吳烽舉致使五官  
伸脚睡喚諸兒畫取長陵土遺此恨欲誰語

程

先字傳之休寧人父官團練以偏師禦金人

於池州殉節死當錄其嗣固讓不受隱居  
東山遣其子永奇師事晦菴卽語錄所稱  
程次卿是也

鎖窗寒 有感

雨洗紅塵雲迷翠麓小車難去淒涼感慨未有今年  
春暮想曲江水邊麗人影沉香歇誰爲主但免葵燕  
麥風前搖蕩徑花成土 空被多情苦歎嘉會難逢  
少年幾許紛紛沸鼎負了青陽百五待何時重覩太  
平典衣貰酒相爾汝算蘭亭有此歡娛又却悲今古

蘇

洞字召叟山陰人有冷然閣集

雨中花 懷劉改之



十載尊前放歌起舞人間酒戶詩流盡期君凌厲羽  
翮高秋世事幾如人意儒冠還負身謀歎天生李廣  
才氣無雙不得封侯榆關萬里一去飄然片雲甚  
處神州應悵望家人父子重見無由隴水寂寥傳恨  
淮山宛轉供愁這回休也燕鴻南北長隔英游

劉圻父字子寰號篁嶠游朱文公之門有麻沙集

花發沁園春呈史滄洲

換譜伊涼選歌燕趙一番樂事重起花新笑靨柳軟  
纖腰濟楚衆芳圍裏年年佳會長是傍清明天氣正  
魏紫衣染天香蜀紅妝破春睡一簇猩羅鳳翠遍  
東園西城點檢芳事銓齋吏散畫館人稀幾闋管絃  
清脆人生適意流轉共風光遊戲到遇景取次成歡  
怎教良夜休醉

詞綜卷十四

詞綜卷十五

宋詞六十六首

姜夔二十二首

陸游十五首

陳亮三首

劉過九首

楊炎六首

張輯十一首

姜

夔字堯章鄱陽人流寓吳興有白石詞五卷

范石湖云白石有裁雲縫月之妙手敲金

戛玉之奇聲 趙子固云白石詞家之申

韓也 黃叔暘云白石詞極精妙不減清

真其高處有美成所不能及 沈伯時云

白石清勁知音亦未免有生硬處 張叔

夏云姜白石如野雲孤飛去留無迹又云

白石詞不惟清虛且又騷雅讀之使人神

觀飛越

探春慢過雪溪別鄭次皋諸君

衰草愁烟亂鴉送目飛沙迴旋平野拂雪金鞭欺寒  
茸帽還記章臺走馬誰念漂零久謾贏得幽懷難寫  
故人青盼相逢小窗閑共情話 長恨離多會少重

訪問竹西珠淚盈把鴈磧沙平漁汀人散老去不堪  
遊冶無奈茗溪月又喚我扁舟東下甚日歸來梅花

詞

綜

卷十五

一

中華書局聚

零亂春夜

一萼紅 人日登長沙定王臺

古城陰有官梅幾許紅萼未宜簪池面冰膠牆腰雪  
老雲意還又沉沉翠藤共閑穿徑竹漸笑語驚起臥  
沙禽野老林泉故王臺榭呼喚登臨 南去北來何  
事蕩湘雲楚水目極傷心朱戶黏雞金盤簇燕空歎  
時序侵尋記曾共西樓雅集想垂柳還裊萬絲金待  
得歸鞍到時只怕春深

揚州慢 淳熙丙申至日過揚州

淮左名都竹西佳處解鞍少駐初程過春風十里盡  
薺麥青青自胡馬窺江去後廢池喬木猶厭言兵漸  
黃昏清角吹寒都在空城 杜郎俊賞算如今重到  
須驚縱荳蔻詞工青樓夢好難賦深情二十四橋仍  
在波心蕩冷月無聲念橋邊紅藥年年知爲誰生

點絳脣 吳淞

燕鴈無心太湖西畔隨雲去數峯清苦商略黃昏雨  
第四橋邊擬共天隨住今何許凭欄懷古殘柳參  
差舞

暗香 石湖詠梅

舊時月色算幾番照我梅邊吹笛喚起玉人不管清

寒與攀摘何遜而今漸老都忘却春風詞筆但怪得  
竹外疎花香冷入瑤席 江國正寂寂數寄與路遙  
夜雪初積翠尊易泣紅萼無言耿相憶長記曾攜手  
處千樹壓西湖寒碧又片片吹盡也幾時見得

疎影前題

苔枝綴玉有翠禽小小枝上同宿客裏相逢籬角黃  
昏無言自倚修竹昭君不慣胡沙遠但暗憶江南江  
北想珮環月下歸來化作此花幽獨 猶記深宮舊  
事那人正睡裏飛近蛾綠莫似春風不管盈盈早與  
安排金屋還教一片隨波去又却怨玉龍哀曲等恁  
時重覓幽香已入小窗橫幅張叔夏云暗香疎影二  
曲前無古人後無來者真爲絕唱

長亭怨慢

漸吹盡枝頭香絮是處人家綠深門戶遠浦縈迴暮  
帆零亂向何許閱人多矣誰得似長亭樹樹若有情  
時不會得青青如此 日暮望高城不見只見亂山  
無數韋郎去也怎忘得玉環分付第一是早早歸來  
怕紅萼無人爲主算只有并刀難剪離愁千縷

齊天樂蟋蟀

庾郎先自吟愁賦淒淒更聞私語露濕銅鋪苔侵石

井都是曾聽伊處哀音似訴正思婦無眠起尋機杼  
曲曲屏山夜涼獨自甚情緒 西窗又吹暗雨爲誰  
頻斷續相和砧杵候館吟秋離宮弔月別有傷心無  
數幽詩謾與笑籬落呼燈世間兒女寫入琴絲一聲  
聲更苦 張叔夏云全章精粹所詠瞭然在目且不留  
滯于物

念奴嬌 荷花

開紅一舸記年時常與鴛鴦爲侶三十六陂人未到  
水佩風裳無數翠葉吹涼玉容消酒更灑菰蒲雨嫣  
然搖動冷香飛上詩句 日暮青蓋亭亭情人不見  
爭忍凌波去只恐舞衣寒易落愁入西風南浦高柳  
垂陰老魚吹浪留我花間住田田多少幾回沙際歸  
路

湘月 卽念奴嬌之鬲指聲也

五湖舊約問經年底事長負清景暝入西山漸喚我  
一葉夷猶乘興倦網都收歸禽時度月上汀洲冷中  
流容與畫橈不點清鏡 誰解喚起湘靈烟鬟霧鬢  
理哀絃鴻陣玉塵談玄數坐客多少風流名勝暗柳  
蕭蕭飛星冉冉夜久知秋信鱸魚應好舊家樂事誰  
省



淡黃柳 合肥

空城曉一作畫角吹入垂楊陌馬上單衣寒側側看  
盡鵝黃嫩綠都是江南舊相識 正岑寂明朝又寒  
食強攜酒小橋宅怕梨花落盡成秋色燕燕飛來問  
春何在唯有池塘自碧

側犯 芍藥

恨春易去甚春却向揚州住微雨正繭栗梢頭弄詩  
句紅橋二十四總是行雲處無語漸半脫宮衣笑相  
顧 金壺細葉千朶圍歌舞誰念我鬢成絲來此共  
樽俎後日西園綠陰無數寂寞劉郎自脩花譜

惜紅衣 荷花

枕簟邀涼琴書換日睡餘無力細灑冰泉并刀破甘  
碧牆頭喚喚酒誰問訊城南詩客岑寂高樹晚蟬說西  
風消息 虹梁水陌魚浪吹香紅衣半狼籍維舟試  
望故國渺天北可惜渚邊沙外不共美人遊歷問甚  
時同賦三十六陂秋色

琵琶仙 吳興

雙槳來時有人似舊曲桃根桃葉歌扇輕約飛花蛾  
眉正奇絕春漸遠汀洲自綠更添了幾聲啼鴉十里  
揚州三生牡牧前事休說 又還是宮燭分烟奈愁

裏匆匆換時節都把一襟芳思與空階榆莢千萬縷  
藏鴉細柳爲玉尊起舞迴雪想見西出陽關故人初  
別

淒涼犯 合肥秋夕

綠楊巷陌西風起邊城一片離索馬嘶漸遠人歸甚  
處戍樓吹角情懷正惡更衰草寒烟淡薄似當時將  
軍部曲迤邐度沙漠追念西湖上小舫攜歌晚花  
行樂舊游在否想如今翠凋紅落謾寫羊裙等新鴈  
來時繫著怕匆匆不肯寄與誤後約

翠樓吟

武昌安遠樓成

月冷龍沙塵清虎落今年漢酺初賜新翻胡部曲聽  
氈幕元戎歌吹層樓高峙看檻曲縈紅簷牙飛翠人  
姝麗粉香吹下夜寒風細此地宜有神仙擁素雲  
黃鸝與君遊戲玉梯凝望久歎芳草萋萋千里天涯  
情味仗酒被清愁花消英氣西山外晚來還捲一簾  
秋霽

法曲獻仙音

張彥遠官舍

虛閣籠寒小簾通月暮色偏宜高處樹隔離宮水平  
馳道湖山盡入尊俎奈楚客淹留久砧聲帶愁去  
屢回顧過秋風未成歸計誰念我重見冷楓紅舞喚

起淡妝人問逋仙今在何許象筆鸞箋甚而今不道  
秀句怕平生幽恨化作沙邊烟雨

眉嫵戲張仲遠

看垂楊連苑杜若吹沙愁損未歸眼信馬青樓去重  
簾下娉婷人妙飛燕翠尊共款聽艷歌郎意先感便  
攜手月地雲堦裏愛良夜微燠無限風流疎散有  
暗藏弓履偷寄香翰明月聞津鼓湘江上催人還解  
春纜亂紅萬點悵斷魂烟水遙遠又爭似相攜乘一  
舸鎮長見

石湖仙 寄石湖處士

松江烟浦是千古三高游衍佳處須信石湖仙似鴟  
夸翩然引去浮雲安在我自愛綠香紅嫵容與看世  
間幾度今古盧溝舊曾駐馬爲黃花閑吟秀句見  
說兒也學綸巾軟羽玉友金蕉玉人金縷緩移箏  
柱聞好語明年定在槐府

解連環

玉鞍重倚却沉吟未上又縈離思爲大喬能撥春風  
小喬妙攜箏鴈啼秋水柳怯雲鬆更何必十分梳洗  
道郎攜羽扇那日隔簾半面曾記西窗夜涼雨霽  
歎幽歡未足何事輕棄問後約空指薔薇算如此溪

山甚時重至水驛燈昏又見在曲屏近底念惟有夜來皓月照伊自睡

八歸湖中送胡德華

芳蓮墜粉疎桐吹綠庭院暗雨乍歇無端抱影銷魂處還見篠牆螢螢暗蘚堦蛩切送客重尋西去路問水面琵琶誰撥最可惜一片江山總付與啼鴉長恨相從未款而今何事又對西風離別渚寒烟淡棹移人遠縹緲行舟如葉想文君望久倚竹愁生步羅襪歸來後翠尊雙飲下了珠簾玲瓏閑看月

玲瓏四犯越中歲暮

疊鼓夜寒垂燈春淺匆匆時事如許倦遊歡意少倦仰悲今古江淹又吟恨賦記當時送君南浦萬里乾坤百年身世惟有此情苦揚州柳垂官路有輕盈換馬端正窺戶酒醒明月下夢逐潮聲去文章信美知何用謾贏得天涯羈旅教說與春來要尋花伴侶

陸游

字務觀山陰人以蔭補登仕郎隆興初賜

進士出身范成大帥蜀爲參議官入譏其

類放因自號放翁嘉泰初詔同脩國史升

寶章閣待制有劍南集詞二卷

劉潛夫云放翁稼軒一掃纖艷不事斧鑿



高則高矣但時時掉書袋要是一癖

南鄉子

歸夢寄吳檣水驛江程去路長想見芳洲初繫纜斜  
陽烟樹參差認武昌愁鬢點新霜曾是朝衣惹御  
香重到故鄉交舊少淒涼却恐他鄉勝故鄉

好事近

湓口放船歸薄暮散花洲宿兩岸白蘋紅蓼映一簑  
新綠有沽酒處便爲家菱芡四時足明日又乘風  
去任江南江北

朝中措

怕歌愁舞懶逢迎妝晚託春醒總是向人深處當時  
枉道無情關心近日啼紅密訴剪綠深盟杏館花  
陰恨淺畫堂銀燭嫌明

又

寥寥儼鼓錢流年燭焰動金船綵燕難尋前夢酥花  
空點春妍文園謝病蘭成久旅回首淒然明月梅  
山笛夜和風禹廟鶯天

水龍吟

春日游摩訶池

摩訶池上追游路紅綠參差春晚韶光妍媚海棠如  
醉桃花欲暖挑菜初閑禁烟將近一城絲管看金鞍



爭道香車飛蓋爭先占新亭館  
惆悵年華暗換黯銷魂  
雨收雲散鏡奩掩月釵梁折鳳秦箏斜鴈身在  
天涯亂山孤壘危樓飛觀歎春來只有楊花和恨向  
東風滿

采桑子

寶釵樓上妝梳晚  
嬾上秋千閑撥沉烟金縷衣寬睡  
髻偏鱗鴻不寄遼東信  
又是經年彈淚花前愁入  
春風十四絃

漁家傲

寄仲高

東望山陰何處是  
往來一萬三千里  
寫得家書空滿紙  
流清淚書回已是明年事  
寄語紅橋橋下水  
扁舟何日尋兄弟  
行徧天涯真老矣  
愁無寐鬢絲幾縷  
茶烟裏

極相思

江頭疎雨輕烟寒  
食落花天翻紅墜  
素殘霞暗錦一段  
淒然惆悵東君堪恨處  
也不念冷落樽前那堪  
更看漫空相趁柳絮榆錢

雙頭蓮

呈范至能待制

華髮星星驚壯志成虛  
此身如寄蕭條病驥向暗裏  
消盡當年豪氣夢斷故國山川  
隔重重烟水身萬里

舊社凋零青門俊遊誰記  
盡道錦里繁華數官閑  
晝永柴荆添睡清愁自醉念此際付與何人心事縱  
有楚枕吳檣知何時東逝空悵望鱸美菰香秋風又  
起

鵲橋仙

華燈縱博雕鞍馳射誰記當年豪舉酒徒一半取封  
侯獨去作江邊漁父  
輕舟八尺低篷三扇占斷蘋  
洲烟雨鏡湖元自屬閑人又何必官家賜與

又夜聞杜鵑

茅簷人靜蓬窗燈暗春晚連江風雨林鶯巢燕總無  
聲但月夜常啼杜宇  
催成清淚驚殘孤夢又揀深  
枝飛去故山猶自不堪聽况半世飄然羈旅

感皇恩

小閣倚秋空下臨江渚漠漠孤雲未成雨數聲新鴈  
回首杜陵何處壯心空萬里人誰許  
黃閣紫樞築  
壇開府莫怕功名欠人做如今熟計只有故鄉歸路  
石帆山脚下菱三畝

沁園春三榮橫谿閣小宴

粉破梅梢綠動萱叢春意已深漸珠簾低捲筇枝微  
步冰開躍鯉林暖鳴禽荔子扶疎竹枝哀怨濁酒一

尊和淚斟凭欄久歎山川冉冉歲月駸駸 當時豈料如今謾一事無成霜鬢侵看故人強半沙堤黃閣魚懸帶玉貂映蟬金許國雖堅朝天無路萬里淒涼誰寄音東風裏有灞橋烟柳知我歸心

又

一別秦樓轉眼新春又近放燈憶盈盈倩笑纖纖柔握雪香花語玉暖酥凝念遠愁腸傷春病思自怪平生殊未曾君知否漸香消蜀錦淚漬吳綾 難求繫日長繩况倦客飄零少舊朋但江郊鴈起漁村笛遠寒缸委燼孤硯生冰水繞山圍烟昏雲慘縱有高臺常怯登消魂處是魚箋不到蘭夢無憑

真珠簾

山村水館參差路感羈游正似殘春風絮掠地穿簾知是竟歸何處鏡裏新霜空自憫問幾時鸞臺鰲署遲暮謾憑高懷遠書空獨語 自古儒冠多誤悔當年早不扁舟歸去醉下白蘋洲看夕陽鷗鷺菰菜鱸魚都棄了只換得青衫塵土休顧早收身江上一簑烟雨

陳

亮字同父永康人淳熙間詣闕上書孝宗欲

官之亟渡江歸至光宗策進士擢第一授

僉書建康府判官廳公事未至官而卒端  
平初謚文毅有龍川集詞一卷

水龍吟

鬧花深處層樓畫簾半捲東風軟春歸翠陌平莎茸  
嫩垂楊金淺遲日催花淡雲閣雨輕寒輕暖恨芳菲  
世界游人未賞都付與鶯和燕寂寞憑高念遠向南樓一聲歸鴈金釵鬪草青絲勒馬風流雲散羅綬分香翠綃封淚幾多幽怨正銷魂又是疎烟淡月子規聲斷

洞仙歌 秋雨追次李元膺韻

瑣窗秋暮夢高唐人困獨立西風萬千恨又簷花落  
處滴碎空堦芙蓉怨無限秋容老盡枯荷催欲折  
多少離聲鎖斷天涯訴幽悶似蓬山去後方士來時  
揮粉淚點點梨花香潤斷送得人間夜霖鈴更落葉  
梧桐孤燈成暈

虞美人

東風蕩颺輕雲縷時送瀟瀟雨水邊臺榭燕新歸一  
點香泥濕帶落花飛海棠糝徑鋪香繡依舊成春  
瘦黃昏庭院柳啼鴉記得那人和月折梨花

劉

過字改之襄陽人一云太和人有龍洲詞一

詞

綜

卷十五

七

中華書局聚

黃叔暘云改之稼軒之客詞多壯語蓋學

稼軒者也 陶九成云改之造詞膽逸有

思致沁園春二首尤纖麗可愛

賀新郎 贈鄉人朱唐卿

多病劉郎瘦最傷心天寒歲晚客他鄉久大舸翩翩  
何許至元是高陽舊友便一笑相歡攜手與問武昌  
城下月又何如楊子江頭柳追往事兩眉皺 燭花  
自剪明如晝喚青娥小紅樓上殷勤勸酒昵昵琵琶  
恩怨語春筍輕籠翠袖看舞徹金釵微溜若見故鄉  
吾父老道長安市上強如舊重會面幾時又

又去年秋余試牒四明賦贈老娼至今天下與  
禁中皆歌之江西人來以爲鄧南秀詞非也

老去相如倦向文君說似而今怎生消遣衣袂京塵  
曾染處空有香紅尚軟料彼此魂銷腸斷一枕新涼  
眠客舍聽梧桐疎雨秋風顫燈暈冷記初見 樓低  
不放珠簾捲晚妝殘翠蛾狼籍淚痕流臉人道愁來  
須殢酒無奈愁深酒淺但託意焦琴紈扇莫鼓琵琶  
江上曲怕荻花楓葉俱淒怨雲萬疊寸心遠

又西湖



睡覺啼鶯曉醉西湖兩峯日日買花簪帽去盡酒徒  
無人問惟有玉山自倒任拍手兒童爭笑一舸乘風  
翩然去避魚龍不見波聲悄歌韻遠喚蘇小神仙  
路遠蓬萊島紫雲深參差禁樹有烟花遶人世紅塵  
西障日百計不如歸好付樂事與他年少費盡柳金  
梨雪句問沉香亭北何時召心未愜鬢先老

清平樂

新來塞北傳到真消息赤地居民無一粒更五單于  
爭立維師尚父鷹揚熊羆百萬堂堂看取黃金假  
鉞歸來異姓真王

唐多令 重過武昌

蘆葉滿汀洲寒沙帶淺流二十年重過南樓柳下繫  
船猶未穩能幾日又中秋黃鶴斷磯頭故人曾到  
否舊江山渾是新愁欲買桂花同載酒終不似少年  
遊

又重過江南

解纜蓼花灣好風吹去帆二十年重過新灘洛浦凌  
波人去後空夢繞翠屏間飛霧濕征衫蒼蒼烟樹  
寒望星河低處長安綺陌紅樓應笑我爲花事過江  
南

沁園春美人足

洛浦凌波爲誰微步輕生暗塵記踏花芳徑亂紅不  
損步苔幽砌嫩綠無痕襯玉羅慳銷金樣窄載不起  
盈盈一段春嬉游倦笑教人款捻微褪些跟有時  
自度歌勻悄不覺微尖點拍頻憶金蓮移換文鴛得  
侶繡茵催袞舞鳳輕分懊恨深遮牽情半露出沒風  
前烟縷裙知何似似一鈎新月淺碧籠雲

又美人指甲

銷薄春冰碾輕寒玉漸長漸彎見鳳鞋泥污偎人強  
剔龍涎香斷撥火輕翻學撫瑤琴時時欲剪更掬水  
魚鱗波底寒纖柔處試摘花香滿鏤棗成斑時將  
粉淚偷彈記綰玉曾教柳傅看算恩情相著搔便玉  
體歸期暗訴劃遍闌干每到相思沉吟靜處斜倚朱  
脣皓齒間風流甚把仙郎暗掐莫放春閑

行香子

山水扇面

佛寺雲邊茅舍山前樹陰中酒旆低懸峯巒空翠溪  
水清漣只欠桃花欠沙鳥欠漁船無限風烟景趣  
天然最宜他隱者盤旋何人村墅若箇林泉恰似敬  
湖似方口似斜川

楊

炎號止濟翁廬陵人有西樵語業一卷

鵲橋仙

思歸時節乍寒天氣總是離人愁緒夜來無奈被西風更吹做一簾秋雨征衫拂淚闌干倚醉羞對黃花無語寄書除是鴈來時又只恐書成鴈去

蝶戀花

別范南伯

離恨做成春夜雨添得春江剗地東流去弱柳繫船都不住爲君愁絕聽鳴鶻君到南徐芳草渡想得尋春依舊當年路後夜獨憐回首處亂山遮莫無重數

又稼軒坐間作首句用丘六書中語

點檢笙歌多釀酒不放東風獨自迷楊柳院院翠陰停永晝曲欄隨處堪垂手昨日解醒今夕又消得情懷長被春僝僽門外馬嘶人去後亂紅不管花消瘦

秦樓月

東風寂垂楊舞困春無力春無力落紅不管杏花狼籍斷腸芳草萋萋碧新來怪底相思極相思極冷烟池館又將寒食

水調歌頭

把酒對斜日無語問西風胭脂何事都做顏色染笑

詞

綜

卷十五

九一中華書局聚

蓉放眼暮江千頃中有離愁萬斛無處落征鴻天在  
闌干角人倚醉醒中 千萬里江南北浙西東吾生  
如寄尚想三徑菊花叢誰是中州豪傑借我五湖舟  
楫去作釣魚翁故國且回首此意莫匆匆

滿江紅

筆染相思暗題盡朱門白壁動離思春生遠岸烟銷  
殘日楊柳結成羅帶恨海棠染就胭脂色想深情幽  
怨繡屏間雙鸚鵡 春水綠春山碧花有恨人無力  
對一奩愁思十分孤寂寸寸錦腸渾欲斷盈盈玉淚  
應偷滴倩東風吹鴈過江南傳消息

張

輯

字宗瑞鄱陽人有東澤綺語債二卷

朱湛盧云東澤得詩法于姜堯章世謂謫  
仙復作不知其又能詞也

疎簾淡月 寓桂枝香

梧桐雨細漸滴做秋聲被風驚碎潤逼衣篝線裊薰  
爐沉水悠悠歲月天涯醉一分秋一分憔悴紫簫吹  
斷素箋恨切夜寒鴻起 又何苦淒涼客裏負草堂  
春綠竹溪空翠落葉西風吹老幾番塵世從前諳盡  
江湖味聽商歌歸興千里露侵宿酒疎簾淡月照人  
無寐

如此江山寓齊天樂

西風揚子江頭路扁舟雨晴呼渡岸隔瓜洲津橫蒜  
石搖盡波聲千古詩人一去但對峙金焦斷磯青樹  
欲下斜陽長淮渺渺正愁予中流笑與客語把貂  
裘爲浣半生塵土品水烹茶看碑憶鶴恍似舊曾游  
處聊憑陸誦問八極神游肯重來否如此江山更蒼  
烟白鷺

釣船笛寓好事近

載酒岳陽樓秋入洞庭深碧極目水天無際正白蘋  
風急月明不見宿鷗驚醉把玉欄拍誰謂百年心  
事恰釣船橫笛

月當窗寓霜天曉角

看朱成碧曾醉梅花側相遇匆匆相別又爭似不相  
識南北千里隔幾時重見得最苦子規啼處一片  
月當窗白

山漸青寓長相思

山無情水無情楊柳飛花春雨晴征衫長短亭擬  
行行重行行行一作吟到江南第幾程江南山漸青  
碧雲深寓憶秦娥

風淒淒井欄絡緯驚秋啼驚秋啼涼侵好夢月正樓



西 卷簾望月知心誰關河空隔長相思長相思碧雲暮合有美人兮

南浦月 寓點絳脣 賦瀟湘漁父

來剪萼絲江頭一陣鳴簑雨孤篷歸路吹得蘋風暮短髮蕭蕭笑與沙鷗語休歸去玉龍嘶處邀月過南浦

沙頭雨 寓點絳脣

帶醉歸時月華猶在吹簫處曉愁情緒忘却匆匆語客裏風霜詩鬢空如許江南去岸花迎櫓遙隔沙頭雨

花自落 寓謁金門

春寂寞簾底蕙爐烟薄聽盡歸鴻書怎託相思天一角象筆鸞箋閑却秀句與誰商略睡起愁懷何處著無風花自落

垂楊碧 寓謁金門

花半濕睡起一窗晴色千里江南真咫尺醉中歸夢直前度蘭舟送客雙鯉沉沉消息樓外垂楊如此碧問春來幾日

闌干萬里心 寓憶王孫

小樓柳色未春深湘月牽情入苦吟翠袖風前冷不

禁怕登臨幾曲闌千萬里心

詞綜卷十五



詞綜卷十六

宋詞六十一首

謝懋四首

黃機十二首

劉鎮四首

危稹一首

吳禮之三首

劉光祖三首

閻丘次杲一首

馬莊父三首

李洪一首

李泳二首

李漳一首

李浙一首

鄭域一首

戴復古一首

黃銖二首

嚴仁五首

易袂一首

趙善扛四首

毛开四首

王桼一首

曹幽一首

洪咨夔一首

趙汝迕一首

章穎一首

郭應祥一首

陸淞一首

謝

懋字勉仲有靜寄居士樂章二卷

黃叔暘云居士樂章二卷吳坦角明爲序  
稱其片言隻字戛玉鏗金蘊藉風流爲世

所貴

石州引

日腳斜明秋色半陰人意淒楚飛雲特地凝愁做弄  
晚來微雨誰家別院舞困幾葉霜紅西風送客聞砧  
杵鞭馬出都門正潮平洲渚無語匆匆短棹滿載  
離愁片帆高舉京洛紅塵因念幾年羈旅淺顰輕笑  
當時風月逢迎別來誰畫雙眉嫵回首一銷凝望歸  
鴻容與

洞仙歌 春雨

愁邊雨細漠漠天如醉搖颺游絲晚風外釀輕寒和  
暝色花柳難勝春自老誰管啼紅斂翠關情潛入  
夜斜濕簾櫳幾處挑燈耿無寐念陽臺當日事好伴  
雲來因箇甚不入襄王夢裏便添起寒潮捲長江又  
恐是離人斷腸清淚

念奴嬌 中秋呈徐叔至

霽天湛碧正新涼風露冰壺清徹河漢無聲光練練  
湧出銀蟾孤絕岩桂香飄井梧影轉冷浸宮袍潔西  
廂往事一簾輕夢悽切腸斷楚峽雲歸尊前無緒  
知有愁如髮此夕姮娥應也恨冷落瓊樓金闕禁漏  
迢迢邊鴻杳杳幽意憑誰決蘭干星斗落梅二弄初  
闋

憶少年 寒食



池塘綠遍王孫芳草依依斜日遊絲捲晴書繫東風無力  
蜨趁幽香蜂釀蜜秋千外臥紅堆碧心情費  
消遣更梨花寒食

黃

機

字幾仲一云字幾叔東陽人有竹齋詩餘

一卷

乳燕飛

次岳總幹韻

擊碎珊瑚樹爲留春怕春欲去駛如風雨春不留今  
君休問付與流鶯自語但莫賦綠波南浦世上功名  
花梢露政何如一笑翻金縷繫白日莫教暮蒼頭  
引馬城西路趁池亭荻芽尚短梅心未苦小雨欲晴  
晴不定漠漠雪飛輕絮算行樂春來幾度鞭影不搖  
鞍小據過橫塘試把前山數雙白鷺忽飛去

摸魚兒

惜春歸送春惟有亂紅撲簌如雨亂紅也怨春狼籍  
搥得淚痕無數腸斷處更喚起羣鴉催發長亭路征  
鞍難駐但脈脈含顰嗔人底事剛愛逐春去闌干  
凭芳草斜陽凝竚愁連滿眼烟樹鬢鬆不理金釵溜  
鸞鏡一奩香霧花誰主悵玉容寂寞春知否單衣嬾  
卸任門外東風流鶯聲裏盡日攪飛絮

喜遷鶯 香風亭上

詞

綜

卷十六

二中華書局聚

平湖百畝種滿湖蓮葉繞堤楊柳冉冉波光輝輝烟  
影空翠濕霑襟袖靜愜鄰雞啼午暝逼沙鷗眠晝西  
園路更紅塵不斷蜨酣蜂瘦知否堪畫處野薺蕪  
菁胥地鋪茵繡桃李陰邊桑麻叢裏斜矗酒帘誇酒  
竹寺小依山山路茅店平窺津口春又晚正香風有客  
倚欄搔首

水龍吟

晴江滾滾東流爲誰流得新愁去新愁都在長亭望  
際扁舟行處歌罷翻香夢回呵酒別來無據恨荼蘼  
吹盡櫻桃過了便只恁成孤負須信情鍾易感數  
良辰佳期應誤才高自歎彩雲空詠凌波謾賦團扇  
塵生吟箋淚漬一觴慵舉但可嚀雙燕明年還解寄  
平安否

鵲橋仙

一番雨過江頭綠漲催喚扁舟解去重來言語縱堪  
憑一作是相寬怎得似而今且住陽關聲斷同心  
未綰簌簌淚珠無數秋鴻春燕往還時莫忘了錦箋  
分付

醉江月

春愁幾許似春雲藹藹連空無數隱約眉尖偏易得

沒箇因由分付楊柳烟濃海棠花暗綠漲牆頭路小  
樓應是有人和淚凝竚長記寶軸妝成鴛鴦繡嬾  
輕笑歌金縷香雪精神依舊否風月誰憐虛度帶減  
衣寬十分顚顚兩下平分取黃昏可更子規聲碎烟  
塢

傳言玉女次岳總幹韻

日薄風柔池面欲平還皺紋楸玉子磔磔敲春晝繡  
衾半捲花氣濃熏香獸小團初試轆轤銀鬚夢斷  
陽臺甚情懷似病酒冰奩羞對比年時更瘦雙燕乍  
歸寄與綠箋紅豆那堪又是牡丹時候

清平樂

西園啼鳥留得春多少客裏情懷無日好愁損連天  
芳草博山灰冷香殘微風吹滿銀箋卓午花陰不  
動一雙蝴蝶團圓

又江上九日

西風獵獵又是登高節一片情懷無處說秋滿江頭  
紅葉誰憐鬢影淒涼新來更點吳霜孤負萸囊菊  
盞年年客裏重陽

憶秦娥

秋蕭索梧桐落盡西風惡西風惡數聲新雁數聲殘

角 離愁不管人飄泊年年孤負黃花約黃花約幾  
重庭院幾重簾幕

蝶戀花

碧樹涼颺驚畫扇窗戶齊開秋意參差滿先自離愁  
裁不斷蛩螢更作聲聲怨 山遶千重溪百轉隔了  
溪山夢也無由見歸計憑誰占近遠銀缸昨夜花如  
慘

醜奴兒

綺窗撥斷琵琶索一一相思一一相思無限柔情說  
似誰 銀鈎欲寫回文曲淚滿烏絲淚滿烏絲薄倖  
知他知不知

劉

鎮

字叔安南海人嘉泰二年進士自號隨如  
學者稱爲隨如先生

劉潛夫云叔安樂府麗不至褻新不犯陳  
周柳辛陸之能事庶乎兼之

漢宮春 鄭賀守席上懷舊

日軟風柔望暖紅連島晴綠平川尋芳拾藥勝伴陌  
上鮮妍玉驄歸路記青門曾墮吟鞭人去後庭花弄  
影一簾香月娟娟 追念舊游何在數佳期虛度錦  
瑟華年博山夜來燼冷誰換沉烟屏幃半掩奈夢雲

不到愁邊春易老相思無據閑情分付魚箋

水龍吟 丙戌清明和章質夫韻

弄晴臺館收烟候時有燕泥香墜宿醒未解單衣初  
試騰騰春思前度桃花去年人面重門深閉記彩鸞  
別後青驄歸去長亭路芳塵起 十二屏山遍倚任  
蒼苔點紅如綴黃昏人靜暖香吹月一簾花碎芳意  
婆娑綠陰風雨畫橋烟水笑多情司馬留春無計濕  
青衫淚

浣溪沙 丁亥錢元宵

簾幕收燈斷續紅歌臺人散彩雲空夜寒歸路噤魚  
龍宿醉未消花市月芳心已逐柳塘風丁寧鶯燕  
莫匆匆

清平樂 趙園避暑

柳陰庭院簾約風前燕著雨荷花紅半斂消得盈盈  
綠扇竹光野色生寒玉纖雪藕冰盤長記酒醒人  
靜暗香吹月闌干

危

稹字逢吉臨川人淳熙進士歷屯田郎出知  
漳州有巽齋集

漁家傲

老去諸餘情味淺詩情不上閑釵釧寶幌有人紅兩



一珍做宋版印  
鬢簾間見紫雲元在深深院 十四條絃音調遠柳  
絲不隔芙蓉面秋入西窗風露晚歸去懶酒酣一任  
烏巾岸

吳禮之字子和錢唐人有順受老人詞五卷

### 蝶戀花

滿地落紅初過雨綠樹成陰紫燕風前舞烟草低迷  
縈小路晝長人靜局朱戶 沉水香銷新剪苧敲枕  
朦朧花底聞鶯語春夢又還隨柳絮等閑飛過東牆  
去

### 霜天曉角

西風又急細雨黃花濕樓枕一篙烟水蘭舟漾畫橋  
側 念昔空淚滴故人何處覓魂斷菱歌淒怨疎簾  
外暮山碧

又王生陶氏月夜共沉西湖賦此弔之

連環易闕難解同心結癡騃佳人才子情緣重怕離  
別 意切人路絕共沉烟水闊蕩漾香魂何處長橋  
月短橋月

### 劉光祖

字德脩簡州人登進士第慶元初官侍御

史改司農少卿遷起居郎終顯謨閣直學  
士提舉嵩山崇福宮卒謚文節有鶴林詞

醉落魄

春風開者一時還共春風謝柳條送我今槐夏不飲  
香醪孤負人生也曲塘泉細幽琴寫胡牀滑簟應  
無價日遲睡起疎簾挂何不歸歟花竹秀而野

洞仙歌

荷花

晚風收暑小池塘荷淨獨倚胡牀酒初醒起徘徊時  
有香氣吹來雲藻亂葉底游魚動影空擎承露蓋  
不見冰容惆悵明妝曉鸞鏡後夜月涼時月淡花低  
幽夢覺欲憑誰省且應記臨流凭闌干便遙想江南  
紅酣千頃

昭君怨

人在醉鄉居住記得舊曾來去疎雨聽芭蕉夢魂遙  
惆悵柳烟何處目送落霞江浦明夜月當樓照人  
愁

閨中措

浮遠堂

橫江一抹是平沙沙上幾千家到得人家盡處依然  
水接天涯危欄送目翩翩去鷁點點歸鴉漁唱不  
知何處多應只在蘆花

馬莊父字子嚴建安人自號古洲居士

二郎神 柳花

日高睡起又恰見柳梢飛絮情說與年年相挽却又  
因他相誤南北東西何時定看碧沼青浮無數念蜀  
郡風流金陵年少那尋張緒應許雪花比並撲簾  
堆戶更羽綴游絲氈鋪小徑腸斷鶉鴝喚雨舞態顛  
狂恨腰輕怯散了幾回重聚空暗想昔日長亭別酒  
杜鵑催去

朝中措 竹

龍孫脫穎破苔紋英氣欲凌雲深處未須留客春風  
自掩柴門蒲團宴坐輕敲茶臼細撲爐熏彈到琴  
心三疊鷓鴣啼傍黃昏

孤鸞

沙堤香軟正宿雨初收落梅飄滿可奈東風暗逐馬  
蹄輕捲湖波又還漲綠粉牆陰日融烟暖驀地刺桐  
枝上有一聲春喚任酒帘飛動畫樓晚便指數燒  
燈時節非遠陌上叫聲好是賣花行院玉梅對妝雪  
柳鬧蛾兒象生嬌顫歸去爭先戴取倚寶釵雙燕

李

洪字子大廬陵人與弟漳泳淦浙著李氏花

浪淘沙 櫻桃

上苑又春殘。櫻顆如丹。明光宮裏水晶盤。想得退朝花底散。宣賜千官。往事記金鑾。荔子難攀。多情更有酪漿寒。蜀客筠籠相贈處。愁憶長安。

李 咏字子永洪弟

賀新郎 感舊

門掩長安道。捲重簾。垂楊散暑。嫩涼生早。午夢驚回。庭陰翠蝶舞。鶯吟未了。正露冷芙蓉池沼。金雁塵昏。幺絃斷理餘音。尚想腰肢。裊歡漸遠。思還繞。臨臯望極。滄江渺。晚潮平。湘烟萬頃。斷虹殘照。彩舫凌波。分飛後。別浦菱花自老。問錦鯉。何時重到。樓迴層城。看不見。對瀟瀟。瀟瀟暮雨。憐芳草。幽恨闊。楚天杳。

水調歌頭 題甘將軍廟卷雪樓

危樓雲雨上。共下水扶天。羣山四合。飛動寒翠落蒼簷。前盡是。清秋闌檻。一笑波翻濤怒。雪陣卷蒼烟。炎暑去無迹。清駛久翩翩。夜將闌。人欲靜。月初圓。素娥弄影。光射空際。渺嬋娟。不用濯纓垂釣。喚取龍宮仙。駕耕此。萬瓊田。橫笛望中起。吾意已超然。

李 漳字子清一作子申洪弟

多麗

好人人去來欲見無因記當時竊香倚煖豈期蜨散  
鷄分到而今漫勞夢想歎後會慘啼痕繡閣銀屏知  
他何處一重山盡一重雲暮天杳梗踪萍跡還是寄  
孤村寂寥月今宵爲誰虛照黃昏細追思深誠密  
意黯然一餉銷魂仗游魚謾傳尺素望塞鴻空憶回  
紋帳衾寒香銷塵滿博山沉水更誰熏斷腸也無聊  
情味唯是清芳樽沉吟久移燈向壁掩上重門

李

浙字子秀洪弟

踏莎行送新城交代李達善

紅藥香殘綠筠粉嫩春歸何處尋春信繡鞍初上馬  
蹄輕舉頭便覺長安近別酒無情啼妝有恨山城  
向晚斜陽褪清江極目帶寒烟錦鱗去後憑誰問

鄭

域

字中卿號松窗三山人慶元中曾使金著

燕谷剽聞

念奴嬌戊午生日作

嗟來咄去被天公把做小兒調戲蹀雪龍庭歸未久  
還促炎州行李不半年間北□南越一萬三千里征  
衫著破著衫人可知矣休問海角天涯黃蕉丹荔  
白足供甘旨泛綠依紅無箇事時舞斑衣而已救蟻  
藤橋養魚盆沼是亦經綸耳伊周安在且須學老萊



子

戴復古字式之天台人陸游門人有石屏集詞一

卷

清平樂興國軍呈李司直

今朝欲去忽有留人處說與江頭楊柳樹繫我扁舟  
且住十分酒興詩腸難禁冷落秋光借取春風一  
笑狂夫到老猶狂

黃

銖字子厚建安人有穀城集

江神子晚泊分水

秋風嫋嫋夕陽紅晚烟濃暮雲重萬疊青山山外叫  
歸鴻獨上高樓三百尺憑玉楯睇層空人間日月  
去匆匆碧梧桐又西風北去南來消盡幾英雄擲下  
玉尊天外去多少事不言中

漁家傲朱晦翁示歐陽公鼓子詞戲賦

永日離憂千萬緒雪舟遠汎清漳浦珍重故人寒夜  
語揮玉塵沉沉畫閣凝香霧風砌落花留不住紅  
蜂翠蜨閑飛舞明日柳陰江上路雲起處蒼山萬疊  
人歸去

嚴

仁字次山邵武人與同族嚴羽嚴參時稱邵

武三嚴有清江欸乃一卷

詞

綜卷十六

七中華書局聚

玉樓春

春風只在園西畔。薺菜花繁蝴蝶亂。冰池晴綠照還空，香徑落紅吹已斷。  
意長翻恨遊絲短。盡日相思羅帶緩。寶奩如月不欺人，明日歸來君試看。

好事近

舟行

曉色未分明。敲動月邊鼉鼓。卯酒一杯徑醉，又別君南浦。  
春江如席照晴空。大舶夾雙櫓。腸斷斜陽渡口，正落紅如雨。

一落索

清曉鶯啼紅樹。又一雙飛去。日高花氣撲人來，獨自個傷春無緒。  
別後暗寬金縷。倩誰傳語。一春不忍上高樓，爲怕見分攜處。

鷓鴣天

一曲危絃斷客腸。津橋捩舵轉牙樯。江心雲帶蒲帆重，樓上風吹粉淚香。  
瑤草碧，柳芽黃。載將離恨過瀟湘。請君看取東流水，方識人間別意長。

又

行盡春山春事空。別愁離恨滿江東。三更鼓潤官樓雨，五夜燈殘客舍風。  
寒淡淡，曉朧朧。黃雞催斷丑

時鐘紫駟嘶勒金銜響衝破飛花一道紅

易

祓字彥祥一作彥章長沙人一云寧鄉人寧

宗朝賜進士第一累官禮部尚書有山齋集

### 驀山溪

海棠枝上留得嬌鶯語雙燕幾時來並飛入東風院  
宇夢回芳草綠遍舊池塘梨花雪桃花雨畢竟春誰  
主東郊拾翠襟袖霑飛絮寶馬趁雕輪亂紅中香  
塵滿路十千斗酒相與買春同吳姬唱秦娥舞揶揄醉  
青樓暮

趙善扛字文鼎宗室號解林居士

### 重疊金

玉關芳草粘天碧春風萬里思行客嬌馬向風嘶道  
歸猶未歸南雲新有鴈望眼愁邊斷膏沐爲誰容  
倚樓烟雨雨中

### 十拍子上已

柳絮飛時綠暗荼蘼開後春酣花外青帘迷酒思陌  
上晴光收翠嵐佳辰三月三解珮人逢游女踏青  
草鬪宜男醉倚畫欄欄檻北夢遶清江江水南飛鸞  
與共驂

宴清都 錢明遠兄縣丞榮滿赴調

珍做宋版

疎柳無情緒都不管渡頭行客欲去猶依賴得玉光  
萬頃爲人留住相從歲月如驚數回首離歌又賦更  
舉目斜照沉沉西風剪剪秋墅 君行定憶南池歌  
筵舞地花晨月午八輒步日三雍奏樂送君雲路別  
情未抵遺愛試聽取湖山共語便可能無意同傾一  
尊露醕

賀新郎

晝永重簾捲乍池塘一番過雨芰荷初展竹引新梢  
半含粉綠蔭扶疎滿院過花絮蜨稀蜂懶窗戶沉沉  
人不到伴清幽時有流鶯轉凝思久意何限 玉釵  
墜枕風鬟顫湛虛堂壺冰瑩徹簾波零亂自是仙姿  
清無暑月影空隨素扇破午睡香銷餘篆一枕湖山  
千里夢正白蘋烟棹歸來晚雲弄碧楚天遠

毛

開字平仲信安人仕止州倅有樵隱詞一卷

滿庭芳 自宛陵易倅東陽留別諸同寮

世事難窮人生無定偶然蓬轉萍浮爲誰教我徙宦  
到東州還似翩翩海燕舞春至歸及涼秋回頭笑渾  
家數口又泛五湖舟 悠悠當此去黃童白叟莫謾  
相留但谿山好處深負重游珍重諸公送我臨歧淚

欲語先流應須記從今風月相憶在南樓

滿江紅

發火初收秋千外輕烟漠漠春漸遠綠楊芳草燕飛  
池閣已著單衣寒食後夜來還是東風惡對空山寂  
寂杜鵑啼梨花落傷別恨閑情作十載事驚如昨  
向花前月下共誰行樂飛蓋低迷南苑路湔裙悵望  
東城約但老來顚顚惜春心年年覺

謁金門

春已半芳草池塘綠遍山北山南花爛熳日長蜂蝶  
亂閑掩屏山六扇夢好強教驚斷愁對畫梁雙語  
燕故人心不見

畫堂春

華燈收盡雪初殘踏青還爾游盤落梅強半已飛翻  
剗地春寒多病故人日遠幾時雙燕來還可憐樓  
上一凭欄不見長安

王 埜

一作或字子文號潛齋金華人以父介蔭

補官嘉定十二年進士第寶祐初拜端明  
殿學士僉書樞密院事封吳郡侯卒贈七  
官位特進

西河



天下事問天怎忍如此陵圖誰把獻君王結愁未已  
少豪氣槩總成塵空餘白骨黃葦千古恨吾老矣  
東游曾弔淮水繡春臺上一回登一回搵淚醉歸撫  
劍倚西風江濤猶壯人意只今袖手野色裏望長  
淮猶二千里縱有英心誰寄近新來又報烽烟起絕  
域張騫歸來未

曹

幽

字西士號東畝瑞安人嘉泰二年進士第  
累官左司諫以論事忤旨遷起居郎進禮  
部侍郎以寶章閣待制致仕謚文恭

西河

和王潛齋韻

今日事何人弄得如此漫漫白骨蔽川原恨何日已  
關河萬里寂無烟月明空照蘆葦謾哀痛無及矣  
無情莫問江水西風落日慘新亭幾人墮淚戰和何  
者是良籌扶危但看天意只今寂寞藪澤裏豈無  
人高臥閭里試問安危誰寄定相將有詔催公起須  
信前書言猶未

洪咨夔

字舜俞於潛人嘉定二年進士累遷吏部

侍郎兼給事中進刑部尚書拜翰林學士  
知制誥加端明殿學士卒贈兩官有平齋  
集詞一卷

眼兒媚

平沙芳草渡頭村。綠遍去年痕。遊絲上下，流鶯來往，無限銷魂。  
綺窗深靜人歸晚。金鴨水沉溫。海棠影下，子規聲裏，立盡黃昏。

趙汝迂字叔午，樂清人。嘉定中登第，僉判雷州。以詩忤權要，謫官尋卒。

清平樂

初鶯細雨，楊柳低愁縷。烟浦花橋如夢裏。猶記倚樓別語。  
小屏依舊圍香恨。拋薄醉殘妝判。却寸心雙淚爲他花月淒涼。

章

穎字茂獻，臨江軍人。第進士，累官禮部尚書。兼侍讀，贈光祿大夫，謚文肅。

小重山

柳暗花明春事深。小欄紅芍藥，已抽簪。雨餘風軟碎鳴琴。  
遲遲日猶帶一分陰。把酒莫沈吟。身閑無個事，且登臨。  
舊游何處不堪尋。無尋處，惟有少年心。

郭應祥字承禧，臨江人。嘉定間進士。官楚越間，有笑笑詞一卷。

玉樓春

匆匆相遇匆匆去。恰似當初元未遇。生憎黃土嶺頭

塵強學章臺街裏絮 雨荒三徑雲迷路總是離人  
堪恨處從今對酒與常歌空惹離情千萬緒

陸

淞

字子逸會稽人左丞相之孫耆舊續聞稱

爲陸辰州

瑞鶴仙

臉霞紅印枕睡起來冠兒猶是不整屏間麝煤冷但  
眉山壓翠淚珠彈粉堂深晝永燕交飛風簾露井悵  
無人與說相思近日帶圍寬盡 重省殘燈朱幌淡  
月疎窗那時風景陽臺路迴雲雨夢便無準待歸來  
先指花梢教看却把心期細問問因循過了青春怎  
生意穩

張叔夏云景中帶情屏去浮艷

詞綜卷十六

詞綜卷十七

宋詞六十首

盧祖臯十四首

高觀國二十首

史達祖二十六首

盧祖臯字申之永嘉人一云邛州人慶元中登第

嘉定中爲軍器少監有蒲江集詞一卷

黃叔暘云蒲江樂章甚工字字可入律呂

倦尋芳

香泥壘燕密葉巢鶯春晴寒淺花徑風柔著地舞裊  
紅軟鬪草烟欺羅袂薄秋千影落春遊倦醉歸來記  
寶帳歌慵錦屏香暖別來悵光陰容易還又荼蘼  
牡丹開遍妒恨疎狂那更柳花迎面鴻羽難憑芳信  
短長安猶近歸期遠倚危樓但鎮日繡簾高捲

西江月

燕掠晴絲裊裊魚吹水葉粼粼禁街微雨灑芳塵寒  
食清明相近謾著宮羅試煖閑呼社酒酬春晚風  
簾幕悄無人二十四番花信

清平樂

柳邊深院燕語明如剪消息無憑聽又懶隔斷畫屏  
雙扇寶盃金縷紅牙醉魂幾度兒家何處一春游

蕩夢中猶恨楊花

烏夜啼

段段寒沙淺水蕭蕭暮雨孤篷香羅不共征衫遠砧  
杵客愁中別恨慵看楊柳歸期暗數芙蓉碧梧聲  
到紗窗曉昨夜已秋風

又西湖

漾暖紋波颭颭吹晴絲雨濛濛輕衫短帽西湖路花  
氣撲春驄鬪草褰衣濕翠秋千瞥眼飛紅日長不  
放春醪困立盡海棠風

謁金門

蘭棹舉相趁落紅飛去一隙輕簾凝睇處柳絲牽不  
住昨日翠蛾金縷今夜碧波烟渚好夢無憑窗又  
雨天涯知幾許

又

閑院宇獨自行來行去花片無聲簾外雨峭寒生碧  
樹做弄清明時序料理春醒情緒憶得歸時停棹  
處畫橋看落絮

水龍吟淮西重午

會昌湖上扁舟幾年不醉西山路流光又是宮衣初  
試安榴半吐千里江山滿川烟草薰風淮楚念離騷



恨遠獨醒人去闌干外誰懷古 亦有魚龍戲舞豔  
晴川綺羅歌鼓鄉情節意樽前同是天涯羈旅漲綠  
池塘翠陰庭院歸期無據問明年此夜一眉新月照  
人何處

又茶蘼

蕩紅流水無聲暮烟細草粘天遠低徊倦蝶往來忙  
燕芳期頓懶綠霧迷牆翠虬騰架雪明香暖笑依依  
欲挽春風教住還疑是相逢晚 不似梅妝瘦減占  
人間丰神蕭散攀條弄蕊天涯猶記曲欄小院老去  
情懷酒邊風味有時重見對枕幃空想東窗舊夢帶  
將離恨

洞仙歌 茉莉

玉肌翠袖較似茶蘼瘦幾度熏醒夜窗酒問炎州何  
事得許清涼塵不到一段冰壺剪就 晚來庭戶悄  
暗數流光細拾芳英黯回首念日暮江東偏爲魂銷  
人易老幽韻清標似舊正紋簾如波帳如烟更奈向  
月明露濃時候

鷓鴣天

庭綠初圓結蔭濃香溝收拾樹梢紅池塘少歇鳴蛙  
雨簾幕輕迴舞燕風 春又老笑誰同澹烟斜日小

樓東相思一曲臨風笛吹過雲山第幾重

一珍做宋版

魚游春水

離愁禁不去好夢別來無覓處風翻征袂觸目年芳  
如許軟紅塵裏鳴鞭鐙拾翠叢中勾伴侶都負歲時  
暗關情緒昨夜山陰杜宇似把歸期驚倦旅遙知  
樓倚東風凝顰暗數寶香拂拂遺鴛錦心事悠悠尋  
燕語芳草暮寒亂花微雨

賀新郎

彭傅師於三高祠前作釣雪亭趙子野

邀余賦之

挽住風前柳問鷗夷當日扁舟近曾來否月落潮生  
無限事零落茶烟未久謾留得蓴鱸依舊可是功名  
從來誤撫荒祠誰繼風流後今古恨一搔首江涵  
鴈影梅花瘦四無塵雪飛雲凍夜窗如晝萬里乾坤  
清絕處付與漁翁釣叟又恰是題詩時候猛拍闌干  
呼鷗鷺道他年我亦垂綸手飛過我共樽酒

沁園春雙溪狎鷗

幾葉凋楓半篙寒日傍橋繫船愛洞門深鎖人間福  
地雙溪分占天上星躔破帽欹寒短鞭敲月此地經  
行知幾年空贏得似沈郎消瘦還欠詩篇沙鷗伴  
我愁眠向水驛風亭紅蓼邊有村醪可飲且須同醉

溪魚堪鱠切莫論錢笠澤陂頭垂虹亭上橙蟹肥時  
霜滿天相隨否算江南江北惟有君閑

高觀國

字賓王山陰人有竹屋癡語一卷

陳唐卿云竹屋梅谿詞要是不經人道語  
其妙處少游美成亦未及也 張叔夏云

竹屋白石邦卿夢窗格調不凡句法挺異  
俱能特立清新之意刪削靡曼之詞自成

一家

蘭陵王春雨

灑塵閣冪冪天垂似幕春寒峭吹斷萬絲濕影和烟  
暗簾箔清愁曉來覺佳景惜惜過却芳郊外鶯恨燕  
愁不管秋千冷紅索 行雲楚臺約念今古凝情朝  
暮如昨啼紅濕翠春情薄謾一犁江上半篙堤外勾  
引輕陰趁畫角正孤緒寂寞 斑駁止還作聽點點  
簷聲沉沉春酌只愁入夜東風惡怕催教花放遽將  
花落溟濛烟草夢正遠恨怎託

御街行詠轎

藤筠巧織花紋細稱穩步如流水踏青陌上雨初晴  
嫌怕濕文鴛雙履要人送上逢花須住纔過處香風  
起 裙兒挂在簾兒裏更不把窗兒閑紅紅白白簇

花枝恰稱得尋春芳意歸來時晚紗籠引道扶下人微醉

又賦簾

香波半宰深深院正日上花陰淺青絲不動玉鈎閑  
看翠額輕籠葱蒨鶯聲似隔篆烟微度愛橫影參差  
滿那回低挂朱欄畔念悶損無人捲窺春偷倚不  
勝情彷彿見如花嬌面纖柔緩揭瞥然飛去不似春  
風燕

玲瓏四犯

水外輕陰做弄得飛雲吹斷晴絮駐馬橋西還繫舊  
時芳樹不見翠陌尋春漫問著小桃無語恨燕鶯不  
識閑情却隔亂紅飛去少年曾失春風意到如今  
怨恨難訴魂驚冉冉江南遠烟草喚愁如許此意待  
寫翠箋奈斷腸都無新句問甚時舞鳳歌鸞花底再  
看仙侶

菩薩蠻

春風吹綠湖邊草春光依舊湖邊道玉勒錦障泥少  
年游冶時烟明花似繡且醉旗亭酒斜日照花西  
歸鴉花外啼

解連環柳

露條烟葉惹長亭舊恨幾番風月愛細縷先牽輕黃  
漸拂水藏鴉翠陰相接纖軟風流眉黛淺三眠初歇  
柰年華又晚縈絆游蜂絮飛晴雪依依灞橋怨別  
正千絲萬緒難禁愁絕悵歲久應長新條念曾繫花  
驄屢停蘭棹弄影搖晴恨閑損春風時節隔郵亭故  
人望斷舞腰瘦怯

燭影搖紅

別浦潮平遠村帆落烟江冷征鴻相喚著行飛不耐  
霜風緊雪意垂垂未定正慘慘雲橫疎影酒醒情緒  
日晚登臨淒涼誰問行樂京華軟紅不斷香塵噴  
試將心事卜歸期終是無憑準寥落年華將盡誤玉  
人高樓凝恨第一休負西子湖邊江梅春信

喜遷鶯

涼雲歸去再約著晚來西樓風雨水靜簾陰鷗閑菰  
影秋到露汀烟浦試省喚回幽恨盡是愁邊新句倦  
登眺動悲涼還在殘蟬吟處淒楚空見訴香鎖霧  
扁心似秋蓮苦寶瑟彈冰玉臺窺月淺黛可憐偷聚  
幾時翠溝題葉無復繡簾吹絮鬢華晚念庾郎情在  
風流誰與

霜天曉角



春雲粉色春水和烟濕試問西湖楊柳東風外幾絲  
碧望極連翠陌蘭橈雙槳急欲訪莫愁何處旗亭  
在畫橋側

卜算子

屈指數春來彈指驚春去檐外蛛絲網落花也要留  
春住幾日喜春晴幾夜愁春雨十二雕窗六曲屏  
題徧傷春句

少年遊草

春風吹碧春雲映綠夢曉入芳茵軟襯飛花遠連流  
水一望隔香塵萋萋多少江南舊恨翻憶翠羅裙  
冷落閑門淒迷古道烟雨正愁人

齊天樂

碧雲闕處無多雨愁與去帆俱遠倒葦沙閑枯蘭砌  
冷寥落寒江秋晚樓陰縱覽正魂怯清吟病多消黯  
怕揖西風袖羅香自去年減風流江左久客舊游  
得意處朱簾曾卷載酒春情吹簫夜約猶憶玉嬌香  
軟塵樓故苑歎壁月空簷夢雲飛觀送絕征鴻楚峯  
烟數點

又中秋夜懷梅谿

晚雲知有關山念澄霄卷開清霽素景中分冰盤正

溢何啻嬋娟千里危欄靜倚正玉管吹涼翠觴留醉  
記約清吟錦袍初喚醉魂起孤光天地共影浩歌  
誰與舞淒涼風味古驛烟寒幽垣夢冷應念秦樓十  
二歸心對此想斗插天南鴈橫遼水試問姮娥有愁  
能爲寄

玉樓春

春烟淡淡生春水曾記芳洲蘭棹艤岸花香到舞衣  
邊汀草色分歌扇底棹沉雲去情千里愁壓雙鴛  
飛不起十年春事十年心怕說濺裙當日意

永遇樂

次韻弔青樓

淺暈脩蛾脆痕紅粉猶記窺戶香斷奩空塵生砌冷  
誰喚青鸞舞春風花信秋宵月約歷歷此心曾許銜  
芳恨千年怨結玉骨未應成土木蘭艇子莫愁何  
在謾繫寒江烟樹事逐雲沉情隨珮冷短夢分今古  
一杯遙夜孤光難曉多少碎人腸處空淒黯西風細  
雨盡吹淚去

金人捧露盤

楚宮閑金成屋玉爲欄斷雲夢容易驚殘驪歌幾疊  
至今愁思怯陽關清音恨阻抱哀箏知爲誰彈年  
華晚月華冷霜華重鬢華斑也須念閑損雕鞍斜絨

小字錦江三十六鱗寒此情天闊正梅信笛裏關山

鳳栖梧

雲喚陰來鳩喚雨謝了江梅可踏江頭路攔却一番  
花信阻不成日日春寒去見說東風桃葉渡岸隔  
青山依舊橫眉嫵歸鴈不如箏上柱一行常見相思  
苦

賀新郎梅

月冷霜袍擁見一枝年華又晚粉愁香凍雲隔溪橋  
人不度的蝶春心未縱清影怕寒波搖動更沒纖毫  
塵俗態倚高情預得春風寵沉凍蜨挂玄鳳一杯  
正要吳姬捧想見那柔酥弄白暗香偷送回首羅浮  
今在否寂寞烟迷翠壠又爭奈桓伊三弄開遍西湖  
春意爛算羣花正作江山夢吟思怯暮雲重

祝英臺近荷花

擁紅妝翻翠蓋花影暗南浦波面澄霞蘭艇採香去  
有人水濺湘裙相招晚醉正月上涼生風露雨凝  
佇別後歌斷雲閑嬌姿黯黯無語魂夢西風端的此心  
苦遙想芳臉輕顰凌波微步鎮輸與沙邊鷗鷺

清平樂

春蕪雨濕燕子低飛急雲壓前山羣翠失烟水滿湖

輕碧 小蓮相見灣頭清寒不到青樓請上琵琶絃  
索今朝破得春愁

史達祖

字邦卿汴人有梅溪詞二卷

姜堯章云邦卿詞奇秀清逸融情景于一

家會句意于兩得 張功甫云生詞纖綃

泉底去塵眼中妥貼輕圓辭情俱到有瓊

奇警邁清新閑婉之長而無詭蕩汗淫之

失端可分鑣清真平曉方回

綺羅香 春雨

做冷欺花將烟困柳千里偷催春暮盡日冥迷愁裏  
欲飛還住驚粉重蜨宿西園喜泥潤燕歸南浦最妨  
他佳約風流鈿車不到杜陵路 沉沉江上望極還  
被春潮晚急難尋官渡隱約遙峯和淚謝娘眉嫵臨  
斷岸新綠生時是落紅帶愁流處記當日門掩梨花  
剪燈深夜語

雙雙燕 春燕

過春社了度簾幕中問去年塵冷差池欲住試入舊  
巢相並還相雕梁藻井又軟語商量不定飄然快拂  
花梢翠尾分開紅影 芳徑芹泥雨潤愛貼地爭飛  
競誇輕俊紅樓歸晚看足柳昏花暝應自棲香正穩

便忘了天涯芳信愁損翠黛雙蛾日日畫欄獨凭

珍做宋版印

玉樓春梨花

玉容寂寞誰爲主寒食心情愁幾許前身清淡似梅  
妝遙夜依微留月住香迷蝴蝶飛時路雪在秋千  
來住處黃昏著了素衣裳深閉重門聽夜雨

萬年歡

兩袖梅風謝橋邊岸痕猶帶陰雪過了匆匆燈市草  
根青發燕子春愁未醒誤幾處芳音遼絕烟溪上采  
菜人歸定應愁沁花骨非于厚情易歇奈燕臺句  
老難道離別小徑吹衣曾記故里風物多少驚心舊  
事第一是侵墻羅襪如今但柳髮晞春夜來和露梳  
月

壽樓春尋春服感念

裁春衫尋芳記金刀素手同在晴窗幾度因風殘絮  
照花斜陽誰念我今無裳自少年消磨疎狂但聽雨  
挑燈敬牀病酒多夢睡時妝飛花去良宵長有絲  
闌舊曲金譜新腔最恨湘雲人散楚蘭魂傷身是客  
愁爲鄉算玉簫猶逢韋郎近寒食人家相思未忘蘋  
藻香

祝英臺近



落花深芳草暗春到斷腸處金勒驕風欲過大堤去  
翠樓葛嶺西邊恰如舊約畫欄映一枝瓊樹正凝  
佇芳意欺月矜春渾欲便偷去多少鶯聲不敢寄愁  
與謝郎日日西湖如今歸後幾時見倚簾吹絮

西江月

西月澹窺樓角東風暗落簷牙一燈初見影窗紗又  
是重簾不下幽思屢隨芳草閑愁又似楊花楊花  
芳草遍天涯繡被春寒夜夜

夜行船

正月十八日聞賣杏花有感

不剪春衫愁意態過收燈有些寒在小雨空簾無人  
深巷已早杏花先賣白髮潘郎寬沈帶怕看山憶  
他眉黛草色拖裙烟光染鬢長記故園挑菜

蝶戀花

二月東風吹客袂蘇小門前楊柳如腰細胡蝶識人  
遊冶地舊曾來處花開未幾夜湖山生夢寐萍泊  
尋芳只怕春寒裏今歲清明逢上巳相思先到濺裙  
水

臨江仙

草腳青回細膩柳梢綠轉苗條舊遊重到合魂消棹  
橫春水渡人凭赤欄橋歸夢有時曾見新愁未肯

相饒酒香紅被夜迢迢莫教無用月來照可憐宵

又

倦客如今老矣舊遊可奈春何幾曾湖上不經過看  
花南陌醉駐馬翠樓歌遠眼愁隨芳草湘裙憶著  
春羅枉教裝得舊時多向來簫鼓地曾見柳婆娑

八歸

秋江帶雨寒沙縈水入瞰畫樓愁獨烟簑散響驚詩  
思還被亂鷗飛去秀句難續冷眼盡歸圖畫上認隔  
岸微茫雲屋想半屬漁市樵村欲暮競燃竹須信  
風流未老憑持酒慰此淒涼心目一鞭南陌數篙官  
渡賴有歌眉舒綠只匆匆遠眺早覺閑愁挂喬木應  
難禁故人天際望徹淮山相思無鴈足

過龍門

醉月小紅樓錦瑟笙篴夜來風雨曉來收幾點落花  
饒柳絮同爲春愁寄信問晴鷗誰在芳洲綠波寧  
處有蘭舟獨對舊時攜手地情思悠悠

秋霽

江水蒼蒼望倦柳愁荷共感秋色廢閣先涼古簾空  
暮鴈程最嫌風力故園信息愛渠入眼南山碧念上  
國誰是鱸江漢未歸客還又歲晚瘦骨臨風夜

聞秋聲吹動岑寂露蛩鳴清燈冷屋翻書愁上鬢毛  
白年少俊遊渾斷得但可憐處無奈萋萋驚魂採香  
南浦剪梅烟驛

惜黃花定興道中

涵秋寒渚染霜丹樹尚依稀是來時夢中行路時節  
正思家遠道仍懷古更對著滿城風雨黃花無數  
碧雲欲暮美人兮美人兮未知何處獨自捲簾櫳誰  
爲開尊俎恨不得御風歸去

齊天樂賦橙

犀紋隱隱鶯黃嫩籬落翠深偷見細雨重移新霜試  
摘佳處一年秋晚荆江未遠想橘友荒涼木奴嗟怨  
就說風流草泥來趁蟹螯健并刀寒映素手醉魂  
沉夜飲曾倩排遣沆瀣含酸金罍裏玉簫簌吳鹽輕  
點瑤姬齒軟待惜取團圓莫教分散入手溫存怕羅  
香自滿

又白髮

秋風早入潘郎鬢斑斑遽驚如許暖雪侵梳晴絲拂  
領栽滿愁城深處瑤簪謾如便羞插宮花自憐衰暮  
尚想春情舊吟淒斷茂陵女人間公道惟此歎朱  
顏也恁容易墮去湮了重緇搔來更短方悔風流相

誤郎潛幾縷漸疎了銅駝俊遊儔侶縱有黶黶奈何  
詩思苦

又湖上卽席分賦得羽字

鴛鴦拂破蘋花影低低趁涼飛去畫裏移舟詩邊就  
夢葉葉碧雲分雨芳游自許過柳影閑波水花平渚  
見說西風爲人吹恨上瑤樹闌干斜照未滿杏牆  
應望斷春翠偷聚淺約接香深盟搗月誰是窗間青  
羽孤箏幾柱問因甚參差暫成離阻夜色空庭待歸  
聽俊語

夜合花

柳鎖鶯魂花翻蝶夢自知愁染潘郎輕衫未攬猶將  
淚點偷藏念前事怯流光早春窺酥雨池塘向銷凝  
裏梅開半面情滿徐妝風絲一寸柔腸曾在歌邊  
惹恨燭底縈香芳機瑞錦如何未織鴛鴦人扶醉月  
依牆是當初誰敢疎狂把閑言語花房夜久各自思  
量

東風第一枝春雪

巧沁蘭心偷粘草甲東風欲障新暖謾疑碧瓦難留  
信知暮寒較淺行天入鏡做弄出輕鬆纖軟料故園  
不捲重簾誤了乍來雙燕青未了柳回白眼紅欲

斷杏開素面舊游憶著山陰後盟遂妨上苑熏爐重  
熨便放慢春衫鍼線怕鳳靴挑菜歸來萬一灞橋相  
見

又立春

草脚愁回一作蘇花心夢醒鞭香拂散牛土舊歌空  
憶珠簾彩筆倦題繡戶粘雞貼燕想占斷東風來處  
暗惹起一掬相思亂藏翠盤紅縷今夜覓夢池秀  
一作俊遊伴侶憐他梅柳怎忍後天街酥雨待過了  
一月燈期日日醉扶歸去張叔夏云不獨措辭精粹  
又且見時節風物之感

風流子

紅樓橫落日蕭郎去幾度碧雲飛記窗眼遞香玉臺  
妝罷馬蹄敲月沙路人歸如今但一鶯通信息雙燕  
說相思入耳舊歌怕聽金縷斷腸新句羞染烏絲  
相逢南溪上桃花嫩嬌樣淺淡羅衣恰是怨深腮赤  
愁重聲遲悵東風巷陌草迷春恨軟塵庭戶花誤幽  
期多少寄來芳字都待還伊

三姝媚

烟光搖縹瓦望晴簷風裊柳花如灑錦瑟橫牀想淚



痕塵影鳳紋長下倦出犀帷頻夢見王孫驕馬諱道  
相思偷理綃裙自驚腰袂惆悵南樓遙夜記翠箔  
張燈枕肩歌罷又入銅駝遍舊家門巷首詢聲價可  
惜東風將恨與閑花俱謝記取崔徽模樣歸來暗寫  
喜遷鶯元宵

月波凝滴望玉壺天近了無塵隔翠眼圈花冰絲織  
練黃道寶光相直自憐詩酒瘦難應接許多春色最  
無賴是隨香趁燭曾伴狂客踪跡謾記憶老了杜  
郎忍聽東風笛柳院燈疎梅廳雪在誰與細傾春碧  
舊情拘未定猶自學當年游歷怕萬一誤玉人夜寒  
窗際簾隙

湘江靜

暮草堆青雲浸浦記匆匆倦篙曾駐漁榔四起沙鷗  
未落怕愁沾詩句碧袖一聲歌石城怨西風隨去滄  
波蕩晚菰蒲弄秋還重到斷魂處酒易醒思正苦  
想空山桂香懸樹三年夢冷孤吟意短屢烟鐘津鼓  
展齒厭登臨移橙後幾番涼雨潘郎漸老風流頓減  
閑居未賦

陽春

杏花烟梨花月誰與暈開春色坊巷曉愔愔東風斷

舊火銷處近寒食少年踪跡愁暗隔水南山北還是  
寶絡雕鞍被鶯聲喚來香陌 記飛蓋西園寒猶凝  
驚醉耳誰家夜笛燈前重簾不挂殢華裾粉淚曾拭  
如今故里信息賴海燕年時相識奈芳草正鎖江南  
夢春衫怨碧

詞綜卷十七



詞綜卷十八

宋詞六十一首

汪莘七首

吳潛五首

李昂英一首

史嵩之一首

章謙亨一首

趙以夫八首

陳經國二首

方岳五首

張渠一首

洪璚五首

方千里四首

汪暉一首

尹煥二首

馮取洽二首

陳以莊一首

盧炳四首

沈端節一首

潘枋一首

馮艾子一首

黃昇四首

文及翁一首

李芸子一首

嚴羽一首

李廷忠一首

王以寧一首

汪

莘字叔耕休寧人嘉定間下詔求言扣闥三

上書不報爲楊慈湖朱晦庵真西山諸公

所歎服後築室柳溪自號方壺居士有方

壺存稿詞二卷

孫山甫云柳塘長短句似坡翁不受音律

束縛 程洛水曰叔耕蘊霞箋玉滴之奇  
而憂深思遠未易遽班之賀白也

杏花天

美人家在江南住每惆悵江南日暮白蘋洲畔花無數  
還憶瀟湘風度 幸自是斷腸無處怎強作鶯聲  
燕語東風占斷秦箏柱也逐落花歸去

好事近

夾岸隘桃花花下蒼苔如積驀地輕寒一陣上桃花  
顏色 東鄰西舍絕經過新月是相識白玉闌干斜  
倚作蓬山春夕

謁金門

簷漏滴都是春歸消息帶雨牡丹無氣力黃鸝愁雨  
濕 爭看洛陽春色忘却連天草碧南浦綠波雙槳  
急沙頭人佇立

玉樓春贈別孟倉使

一片江南春色晚牡丹花謝鶯聲懶問君離恨幾多  
長芳草連天猶覺短 昨夜溪頭新溜滿樽前自起  
噴龍管明朝飛棹下錢塘心共白蘋香不斷

憶秦娥

村南北夜來陡覺霜風急霜風急征途情緒塞垣消



息 佳人獨抱琵琶泣一江明月空相憶空相憶寒  
衣未絮荻花狼藉

乳燕飛 感秋采楚詞賦此

去郢頻回首正橫江蓀橈容與蘭旌悠久悵望龍門  
都不見似把長楸辜負念往日佳人爲偶獨向芳洲  
相思處采蘋花杜若空盈手乘赤豹誰來後 雲中  
眼界窮高厚覽山川冀州還在陶唐何有木葉紛紛  
秋風晚縹緲瀟湘左右見帝子冰魂相守應記揮絃  
相對日醉一杯太乙東皇酒問此意君知否

八聲甘州

惜餘春蛺蝶引春來杜鵑趣春歸算何如桃李渾無  
言說開落忘機多謝黃鸝舊友相逐落花飛芳草連  
天遠愁殺斜暉 誰向西湖南畔問亭臺在否花木  
應非看孤山山下惟說隱君廬想錢塘春遊依舊到  
梨花寒食隘舟車尋常事不須惆悵暮雨沾衣

吳

潛字毅夫寧國人嘉定十年進士第一淳祐

中參知政事拜右丞相兼樞密使進左丞  
相封慶國公改封許國公景定初安置循  
州卒贈少師有履齋詩餘三卷

滿江紅 滕王閣

萬里西風吹我上滕王高閣正檻外楚山雲漲楚江  
濤作何處征帆林杪去有時野鳥沙邊落近簾鉤暮  
雨掩空來今猶昨 秋漸緊添離索天正遠傷漂泊  
歎十年心事休休莫歲月無多人易老乾坤雖大  
愁難著向黃昏斷送客魂銷城頭角

醉江月

瓜洲會趙南仲端明

紅塵飛騎報元戎小隊踏青南陌雪浪堆邊呼曉度  
吳楚半江分圻歲月驚心風埃眯目相對頭俱白楊  
花撩亂可憐如此春色 誰道燕燕鶯鶯多情猶自  
認得年時客重唱江南腸斷句爲我滿傾雲液畫鼓  
舟移金鞍人遠一晌烟波隔斜陽冉冉依然無限悽  
惻

二郎神

小樓向晚正柳鎖一城烟雨計十里吳山繡簾朱戶  
曾學宮詞內舞浪逐東風無人管但脈脈歲移年度  
嗟往事未塵新愁還織怎堪重訴 凝竚問春何事  
飛紅飄絮縱杜曲秦川舊家都在誰寄音書說與野  
草淒迷暮雲沉黯渾自替人無緒珠淚滴應把寸腸  
萬結夜帷深處

鵲橋仙

扁舟乍泊危亭孤嘯目斷閑雲千里前山急雨過溪  
來盡洗却人間暑氣暮鴉木末落鳬天際都是一  
番一作團秋意癡兒騃女賀新涼也不道西風又起

青玉案

十年三過蘇臺路還又是匆匆去迅景流光容易度  
鷺洲鷗渚葦汀蘆岸總是消魂處蒼烟欲合斜陽  
暮付與愁人砌愁句爲問新愁愁底許酒邊成醉醉  
邊成夢夢斷前山雨

李昂英

一作昂英字俊明一云字公昂番禺人一

云資州人寶慶中進士第三人任臨汀推  
官累官吏部侍郎卒謚忠簡有文溪詞一

卷

蘭陵王

燕穿幕幕春在深深院落單衣試龍沫旋熏又怕東風  
曉寒薄別來情緒惡瘦得腰圍柳弱清明近正似海  
棠怯雨芳踪任飄泊釵留去年約恨易老嬌鶯多  
誤靈鵲碧雲杳緲天涯各望不斷芳草又迷香絮迴  
文強寫字屢錯淚欲注還閣孤酌駐春脚更彩局  
誰快寶軫慵學階除拾取飛花嚼是少春恨等閑  
吞却闌干猛拍歎命薄悔舊諾

史雋之紹定初知江陰軍

望海潮浮遠堂

危岑孤秀飛軒爽豁空江泱泱黃流吳札故丘春申  
舊國西風吹換清秋滄海浪初收共登高臨眺尊俎  
綢繆鳳集高岡駒留空谷接英游 八窗盡控瓊鉤  
送帆檣杳杳潮汐悠悠今古興懷關河極目愁邊滅  
沒輕鷗淮岸隔重洲認澹霞天末一縷青浮未許英  
雄老去西北是神州

章謙亨字牧叔吳興人爲鉛山令

念奴嬌垂楊

垂楊得地在樓臺側畔無人攀折不似津亭舟繫處  
只伴客愁離別絲過搖金帶鋪新翠雅稱鶯調舌芳  
筵相映最宜斜挂殘月 却得連日春寒未教輕滾  
一片庭前雪應恨張郎今老去難比風流時節醉眼  
渾醒愁眉都展舞困腰肢怯有時微笑把伊綰箇雙  
結

趙以夫

字川父長樂人端平中知漳州有虛齋樂府二卷

孤鸞梅

江頭春早問江上寒梅占春多少自照疎星冷牀許



春風到幽香不知甚處但迢迢滿河烟草回首誰家  
竹外有一枝斜好 記當年曾共花前笑念玉雪襟  
期有誰知道喚起羅浮夢正參橫月小淒涼更吹寒  
管謾相思鬢毛驚老待覓西湖半曲對霜天清曉

龍山會九日

九日無風雨一笑凭高浩氣橫秋字羣峯青可數寒  
城小一水縈迴如縷西北最關情謾遙指東徐南楚  
黯消魂斜陽冉冉鴈聲悲苦 今朝寒菊依然重上  
南樓草草成歡聚詩朋休浪賦舊題處俛仰已隨塵  
土莫放酒行疎清漏短涼蟾當午也全勝白衣未至  
獨醒凝竚

角招梅

曉寒薄苔枝上剪成萬點冰萼暗香無處著立馬斷  
魂晴雪籬落溪路約恨寄驛音書遼邈夢遶揚州東  
閣風流舊日何郎想依然林壑 離索引杯自酌相  
看冷淡一笑人如削水雲寒漠漠底處羣仙飛來霜  
鶴芳姿綽約正月滿瑤臺珠箔徙倚闌干寂寞盡分  
付許多愁城頭角

徵招雪

玉壺凍裂琅玕折駸駸逼人衣袂暖絮漲空飛失前



山橫翠欲低還又起似妝點滿園春意記憶當時剡  
中情味一溪雲水天際絕人行高吟處依稀灞橋  
鄰里更剪剪梅花落雲階月砌化工真解事強勾引  
老來詩思楚天暮驛使不來悵曲欄獨倚

二郎神

次陳唯道

野塘暗碧漸點點翠鈿明鏡想書永珠簾人閑金屋  
時倚妝臺照影睡起闌干凝思處漫數盡歸鴉栖暝  
知月下鶯黃雲邊蛾綠爲誰重整曾倩鴈傳鵲報  
心期罕定奈柳絮浮雲桃花流水長是參差不並莫  
怨春歸莫愁柸老蠶已三眠將醒腸斷句枉費丹青  
漠漠水遙烟迥

雙瑞蓮

千機雲錦裏看並蒂新房駢頭芳藥清標艷態兩兩  
翠裳霞袂似是商量心事倚綠蓋無言相對天蘸水  
彩舟過處鴛鴦驚起縹緲漾影搖香想劉阮風流  
雙仙姝麗閑情未斷猶戀人間歡會莫待西風吹老  
薦玉醴碧筒擲醉清露底月照一襟歸思

永遇樂

七夕和劉隨如

雲鴈將秋露螢照夜涼透窗戶星網珠疎月奩金小  
清絕無點暑天孫河鼓東西相望隱隱光流華渚妝

樓上青瓜玉果多少駉兒癡女

金鍼暗度蛛絲密

結便有繫人心處經歲離思霎時歡愛愁緒空萬縷  
人間天上一般情味枉了錦箋囑付又何似吹笙仙  
子跨黃鶴去

鵲橋仙

翠鋪心事紅樓歡宴深夜沉沉無暑竹邊荷外再相  
逢又還逐浮雲飛去錦箋尚濕珠香未歇空惹閑  
愁千縷尋思不似鵲橋人猶自得一年一度

陳經國

嘉禧淳祐間人有龜峯詞一卷

沁園春丁酉歲感事

誰使神州百年陸沉青燵未還悵晨星殘月北州豪  
傑西風斜日東帝江山劉表坐談深源輕進機會失  
之彈指間傷心事是年年冰合在在風寒說和說  
戰都難算未必江沱堪宴安歎封侯心在鱸鯨失水  
平戎策就虎豹當關渠自無謀事猶可做更剔殘燈  
抽劍看麒麟閣豈中興人物不盡儒冠

又送陳起莘歸長樂

過了梅花縱有春風不如早還正燕泥日煖草綿別  
路鶯朝烟淡柳拂征鞍黎嶺天高建溪雷吼歸好不  
知行路難龜山下漸楊梅初熟盧橘猶酸名場老

我間關分歲晚誅茅湖上山歎龍舒君去尚留破硯  
魚軒人老長把連環鏡影霜侵衣痕塵暗贏得狂名  
傳世間君歸日見家林舊竹爲報平安

方

岳字巨山祁門人理宗朝兩爲文學掌故官

中秘書出守袁州有秋屋先生小稿

臺城路和楚客賦蘆

孤蓬夜傍低叢宿蕭蕭雨聲悲切一岸霜痕半山烟  
色愁到沙頭枯葉淡雲沒滅黯西風吹老滿汀新雪  
天豈無情離騷點點送歸客歸去來兮怎得儘驚  
翹鷗倚乍寒時節秋晚山川夕陽浦澈贏得別腸千  
結濤翻浪疊那得似西來一筇橫絕搔首江南鴈銜  
千里月

滿江紅九日冶城樓

且問黃花陶令後幾番重九應解笑秋厓人老不堪  
詩酒宇宙一舟吾倦矣山河兩戒君知否倚西風無  
奈劍花寒虬龍吼江欲醺談天口秋何負持螯手  
儘石麟蕪沒斷烟衰柳故國山圍青玉案何人印佩  
黃金斗倘只消江左管夷吾終須有

水調歌頭

平山堂用東坡韻

秋雨一何碧山色倚晴空江南江北愁思分付酒螺

紅蘆葉蓬舟千里菰菜蓴羹一夢無語寄歸鴻醉眼  
渺河洛遺恨夕陽中蘋洲外山欲暝斂眉峯人間  
俯仰陳迹歎息兩仙翁不見當時楊柳只是從前烟  
雨磨滅幾英雄天地一孤嘯匹馬又西風

又九日多景樓用吳侍郎韻

醉我一壺玉了此十分秋江濤還比當日擊楫渡中  
流問訊重陽烟雨俯仰人間今古此意渺滄洲天地  
幾今夕舉白與君浮舊黃花新白髮笑重游滿船  
明月猶在何日大刀頭誰跨揚州鶴去已怨故山猿  
老借箸欲前籌莫倚闌干北天際是神州

蝶戀花用韻秋懷

鴈落寒沙秋惻惻明月蘆花共是江南客騎鶴樓高  
邊羽急柔情不盡淮山碧世路只催雙鬢白菰菜  
蓴羹正自令人憶歸夢不知江水隔烟帆飛過平如  
席

張槩字方叔潤州人有芸窗詞一卷

青玉案被檄出郊題陳氏山居

西風亂葉溪橋樹秋在黃花羞澀處滿袖塵埃推不  
去馬蹄濃露雞聲淡月寂歷荒村路身名多被儒  
冠誤十載重來慢如許且盡清樽公莫舞六朝舊事



一江流水萬感天涯暮

洪

琰字叔璵自號空同詞客有詞一卷

驀山溪憶中都

潮平風穩行色催津鼓回首望重城但滿眼紅雲紫  
霧分香解佩空記小樓東銀燭暗繡簾垂昵昵凭肩  
語關山千里垂柳河橋路燕子又歸來但惹得滿  
身花雨彩箋不寄蘭夢更無憑燈影下月明中魂斷  
金釵股

踏莎行

滿滿金盃垂垂玉筍離歌不放行人去醉中扶上木  
蘭船醒來忘却桃源路帶綰同心釵分一股斷魂  
空草高唐賦秋山萬疊水雲深茫茫無著相思處

永遇樂送春

歌雪徘徊夢雲溶曳欲勸春住薄倖楊花無端杜宇  
抵死催教人參差烟岫千回百匝不解禁春歸路病  
厭厭那堪更聽小樓一夜風雨金釵鬪草玉盤行  
菜往事了無憑據合數松兒分香柏子總是牽情處  
小桃朱戶題詩在否尚憶去年崔護綠陰中鶯鶯燕  
燕也應解語

瑞鶴仙



聽梅花吹動涼夜何其明星有爛相看淚如霰問而  
今去也何時會面匆匆聚散便作秋鴻社燕最傷心  
夜來枕上斷雲零雨何限因念人生萬事回首悲  
涼都成夢幻芳心繾綣空惆悵巫陽館况船頭一轉  
三千餘里隱隱高城不見恨無情春水連天片帆如  
箭

齊天樂

轆轤聲破銀牀凍霜寒又侵鴛被皓月疎鐘悲風斷  
漏驚起畫樓人睡銀屏十二歎塵滿絲簧暗消金翠  
可恨風流故人迢遞隔千里相思情緒最苦舊歡  
無續處魂夢空費斷鴈無情離鸞有恨空想吳山越  
水花樵玉悴但翠黛愁橫紅鉛淚洗待剪江梅倩誰  
傳此意

方千里三衢人有和清真詞

齊天樂

碧紗窗外黃鸝語聲聲似愁春晚岸柳飄綿庭花墮  
雪惟有平蕪如剪重門向掩看風動疎簾浪鋪湘簟  
暗想前歡舊遊心事寄詩卷鱗鴻音信未覩夢魂  
尋訪後關山又隔無限客館愁思天涯倦跡幾許良  
宵展轉閑情意遠記密閣深閨繡衾羅薦睡起無人

料應眉黛斂

塞垣春和周清真

四遠天垂野向晚景雕鞍卸吳藍滴草塞綿藏柳風  
物堪畫對雨收霧霽初晴也正陌上烟光灑聽黃鸝  
啼紅樹短長音如寫懷抱幾多愁年時趁歡會幽  
雅盡日足相思奈春晝難夜念征塵滿堆襟袖那堪  
更獨游花陰下一別鬢毛減鏡中霜滿把

醜奴兒

凌波臺畔花如剪幾點吳霜烟淡雲黃東閣何人見  
晚妝江南春近書千里誰寄清香別墅橫塘鼓角  
聲中又夕陽

迎春樂

紅深綠暗春無跡芳心蕩冶遊客記搖鞭跋馬銅駝  
陌凝睇認珠簾側絮滿愁城風卷白遞多少相思  
消息何處約歡期芳草外高樓北

汪暉

字處微績溪人開禧中一至闕下不就舉  
試而歸棲隱山中卒里人私謚曰康範先  
生

蝶戀花秋夜簡趙尉

午夜涼生風小住銀漢無聲雲約疎星度佳客欲眠

知未去對牀只欠蕭蕭雨 素月四更山外吐酒醒  
衾寒消盡沉烟縷料想玉樓人倚處歸帆日竚烟中  
浦

尹 煥字惟曉山陰人官左司有梅津集

霓裳中序第一 茉莉

青鬢粲素靨海國仙人偏耐熱  
飡盡風香露屑便萬里凌空肯憑蓮葉盈盈步月悄似憐輕去  
瑤闕人何在憶渠癡小點點愛清絕  
愁絕舊遊輕別忍重看  
瑣香金篴淒淒涼清夜簾第杳杳詩魂真化風蝶冷香  
清到骨夢十里梅花霽雪歸來也慼慼心事自共素娥說

唐多令 吳興席上

蘋末轉清商溪聲供夕涼  
緩傳杯催喚紅妝斜綰烏雲新浴罷裙拂地水沉香  
歌短舊情長重來驚鬢霜悵綠陰青子成雙說著前歡佯不記  
一作保颺蓮子打鴛鴦周公謹云可與杜牧之尋芳較晚爲偶  
馮取洽字熙之延平人自號雙溪翁

蝶戀花 和玉林韻

秋到雙溪溪上樹葉葉涼聲未省  
來何許盡拓溪樓窗與戶倚欄清夜窺河鼓  
那得吟朋同此住獨對

秋芳欲寄花無處杖屨相從曾有語未來先自愁君去

摸魚兒

和玉林韻蓋爲遺蛻山中桃花作

歎劉郎那回輕別霏霏三落紅雨玄都觀裏應遺恨  
一抹淡烟殘縷愁望處想霧暗雲深忘却來時路新  
花舊主記刻羽流商裁紅剪翠山徑日將暮空枝  
上時有幽禽對語聲聲如問來否人生行樂須聞健  
衰老念誰免此吾所與在溪上深深錦繡花千塢何  
時定去但對酒思君呼兒爲我頻唱小桃句

陳以莊字敬叟建安人有月溪集

水龍吟 錢塘記恨

晚來江闊潮平越船吳榜催人去稽山滴翠胥濤濺  
恨一襟離緒訪柳章臺問桃仙浦物華如故向秋娘  
渡口秦娘橋畔依稀是相逢處窈窕青門紫曲舊  
羅新衣翻金縷舊音恍記輕攏慢撚哀絃危柱金屋  
難成阿嬌已遠不堪春暮聽一聲杜宇紅殷綠老雨  
花風絮

盧

炳字叔陽有烘堂詞一卷

謁金門

春寂寂節物又催寒食樓上捲簾雙燕入斷魂愁似



織門外雨餘風急滿地落英紅濕好夢驚回無處  
覓天涯芳草碧

又

春事寂苦筍鮓魚初食風捲繡簾飛絮入柳絲繁似  
織迅速韶光去急雨過綠陰尤濕回首舊遊何處  
覓遠山空佇碧

點絳脣

過眼溪山向來都是經行處驂鸞人去冷落吹簫侶  
小立江亭愁對蒹葭浦無情緒酒杯慵舉閑看江  
楓舞

踏莎行

秋色人家夕陽洲渚西風催過黃華渡江烟引素忽  
飛來水禽破暝雙雙去奔走紅塵棲遲羈旅斷腸  
猶憶江南句白雲低處鴈回峯明朝便踏瀟湘路  
沈端節字約之吳興人有克齋詞一卷

虞美人

去年寒食初相見花上雙飛燕今年寒食又花開垂  
下重簾不許燕歸來隔簾聽燕呢喃語似說相思  
苦東君都不管閑愁一任落花飛燕兩悠悠

潘

枋初名公筠夢南臺人持方牛首與之遂易



名字庭堅閩縣人端平初進士通判潭州

有紫巖集

### 羽仙歌

雕簷綺戶倚晴空如畫曾是吳王舊臺榭自浣紗人去後落日平蕪行雲斷幾見花開花謝淒涼闌檻外一簇青山多少圖王共爭霸莫閑愁金杯潋灩對酒當歌歡娛地夢中興亡休話漸倚遍西風晚潮生明月裏鷺鷥背人飛下

馮艾子

字偉壽號雲月雙溪子

黃叔暘云偉壽精于律呂詞多自製腔

### 春風嫵娜

被梁間雙燕話盡春愁朝粉謝午花柔倚紅欄故與蜨圍蜂遶柳綿無數飛上搔頭鳳管聲圓蠶房香煖笑挽羅衫須少留隔院蘭馨趁風遠鄰牆桃影伴烟收些子風情未減眉頭眼尾萬千事欲說還休薔薇露一作刺牡丹球慙慙記省前度綢繆夢裏飛紅覺來無覓望中新綠別後空稠相思難偶歎無情明月今年已是一作見三度如鉤

黃

昇

一作昉字叔暘號玉林有散花菴詞一卷

胡季直云玉林蚤棄科舉雅意讀書間從

吟詠自適游受齋嘗稱其詩爲晴空冰柱  
樓秋房聞其與魏菊莊友善併以泉石清  
士目之

### 月照梨花

晝景方永重簾花影好夢猶酣鶯聲喚醒門外風絮  
交飛送春歸脩蛾畫了無人問幾多別恨淚洗殘  
妝粉不知嘶馬何處烟草萋迷鷓鴣啼

### 醉江月題玉林

玉林何有有一彎蓮沼數間茅宇斷塹疎籬聊補葺  
那得粉牆朱戶禾黍西風雞豚曉日活脫田家趣客  
來茶罷自挑野菜同煮多少甲第連雲十眉環座  
人醉黃金塢回首邯鄲春夢破零落珠歌翠舞得似  
衰翁蕭然陋巷長作溪山主紫芝可採更尋岩谷深  
處

又

西風解事爲人間洗盡三庚煩暑一枕新涼宜客夢  
飛入藕花深處冰雪襟懷琉璃世界夜氣清如許劃  
然長嘯起來秋滿庭戶應笑楚客才高蘭成愁悴  
遺恨傳千古作賦吟詩空自好不直一盃秋露淡月  
闌干微雲河漢耿耿天催曙此情誰會梧桐葉上疎

雨

鵲橋仙

青林雨歇珠簾風細人在綠陰庭院夜來能有幾多  
寒已瘦了梨花一半寶釵無據玉琴難托合造一  
襟幽怨雲窗霧閣事茫茫試與問杏梁雙燕

文及翁字時學號本心綿州人歷官參知政事

賀新涼遊西湖有感

一勺西湖水渡江來百年歌舞百年酣醉回首洛陽  
花石盡烟渺黍離之地更不復新亭墮淚簇樂紅妝  
搖畫舫問中流擊楫何人是千古恨幾時洗余生  
自負澄清志更有誰磻溪未遇傅巖未起國事如今  
誰倚仗衣帶一江而已便都道江神堪恃借問孤山  
林處士但掉頭笑指梅花蕊天下事可知矣

李芸子字耘叟號芳州昭武人

木蘭花慢

占西風早處一番雨一番秋記故國斜陽去年今日  
落葉林幽悲歌幾回激烈寄疎狂酒令與詩籌遺恨  
清商易改多情紫燕難留嗟休觸緒繭絲抽舊事  
續何由奈予懷渺渺羈愁鬱鬱歸夢悠悠生平不如  
老杜便如他飄泊也風流寄語庭柯徑菊甚時得棹

孤舟

巖

羽字儀卿樵川人自號滄浪逋客

滿江紅 送廖叔仁赴闕

日近觚稜秋漸滿蓬萊雙闕正錢塘江上潮頭如雪  
把酒送君天上去瓊琚玉佩鵷鴻列丈夫兒富貴等  
浮雲看名節天上事吾能說今老矣空凝絕對西  
風慷慨唾壺歌缺不灑世間兒女淚難堪親友中年  
別問相思他日鏡中看蕭蕭髮

李廷忠字居厚號橘山有樂府一卷

生查子 薔薇

玉女翠帷薰香粉開妝面不是占春遲羞被羣花見  
纖手纖柔條絳雪飛千片流入紫金卮未許停歌  
扇

王以寧

字周士長沙人歷官宣撫司參謀制置襄

鄧

水調歌頭 裴公亭懷古

歲歲橘洲上老葉舞愁紅西山光翠依舊影落酒盃  
中人在子亭高處下望長沙城郭獵獵酒帘風遠水  
湛寒碧獨釣綠簑翁懷往事追昨夢轉頭空孫郎  
前日豪健頭指五都雄起擁奇才劍客十萬銀戈赤

憤歌鼓壯軍容何似裴相國談道老圭峯

珍做宋版印

詞綜卷十八